

T 5235.8/1308(5)

二家詩鈔

宋氏綿津集下



HARVARD-YENCHING LIBRARY
HARVARD UNIVERSITY
2 DIVINITY AVENUE

NOV 30 1966

宋氏綿津詩鈔卷五

哈佛大學哈佛燕京
圖書館珍藏印

漫堂與朱悔人夜坐出示曾青藜周青士詩箋卽
用青士鐵舟讌集韻

花發傍地爐斗室安且燠隔牖聞驚風冰折階下木歲
晏鎖印餘來對萬卷宿高談得夫君偃仰愜所欲碑版
窮籀斯名畫亦在目時話匡廬遊緬想康王谷更授處
士篇敢不拜命辱冷然金石聲厥品維嶽瀆放懷聊和
歌跋燭頗能速何異登鐵舟吟社一再續呼童滌匏杯
漉酒出豐潤漉灑屬清琴座閒橫古調宜共勗

甲子除夕同悔人賦用曹升六舍人贈基兒韻

當今天子龍鳳姿坐致太平民物熙上陵瑞雪孝思
感豈必甘露麒麟芝浴牒良愧此臥理維齊蓋公真吾
師香凝畫戟溯先烈兩世姓字豐碑遺瞻言祖德咏迪
志循牆而走潮河溜竭來歲序類轉轂千門爆竹聲相
隨一時賓從得老輩掀髯抵掌談風詩願與周旋屬橐
鞬松陵皮陸堪繼之自顧往往出下駟敢分壇坫稱工
倕漫堂守歲燔兔首明燈積雪光離離盈觴溲酒莫遽
醉五更三點起祝釐憶昔飲飛值此際執戟恆拂宮花
枝祇今短髭白頗鑷但未龍鍾來嘲譏盤山老衲屢招
我咫尺不去將何爲春風幾日杏花發相期濯足紅龍

池

除夜懷王阮亭少詹黃湄黃門奉使嶺南用青藜
依園讌集韻

空階雪氣逼簾清又聽他鄉爆竹聲鬪箸冰魚當燭眺
浮蛆溲酒入脣輕興餘湖海慚初服醉逐兒童鬧晚晴
惆悵故人趨嶺表梅花香裏是王程

齋中三詠

松雪齋集

雅願終身作蠹魚吳興集刻至元初華亭小記增珍重
不數虞山舊漢書

西園公子琴

夏邑彭堯諭

當年公子號知音也學中郎爨下尋今日登牀彈一曲
西園風調未消沉

萬道人草書

徐州萬壽祺

年少襟期並鐵厓偶然賣字坐中街刻藤半幅山僧寄
醉墨淋漓亦復佳

盤山拙菴道人書來有黃葉飄空白雲滿地之語

賦此荅之

白雲流地滿黃葉向空飄似此道人句寧殊叢桂招聞
鐘眠佛閣隨鹿過溪橋何限曾遊處分明入夢遙

次韻奉荅朱竹垞冬日見寄

故人羈棲在輦下杜門委巷嗟霜風曰歸正須賦緩緩
小飲且爲呼蟲蟲書來大雪歲聿暮劍舞永夜愁難空
他年燒筍竹垞去飽餐那羨吳江菘

人日出郭從響水牕過南溪寺觀先文康詩版晚
至觀音禪院同悔人用虞山先生自拂水至吾

谷尋南巖諸勝韻

時兒基孫如金侍行

人日新霽宜遊騁飯罷兒童再三請東郊策馬一放懷
何必深林與峻嶺河冰將泮沙路融昨日風霾息餘猛
曲渚挑菜流光催叩首天涯歎浮梗晴雲斂盡氣乍暄

擬脫敝裘兼露頂城隅響牖翻瀑花匡廬開先到俄頃
霆飛雷鬪耳欲聾大是奇觀要細領迴堤迤邐野意多
老樹長河背萬井吏人莫進賓從佳旁午盤桓忽斜景
招提訪舊罟罟傾削磴雖存待重整周旋杖履三紀餘
版上一詩還記省如人短柏誰手栽不見參天舊文杏
傷心斗室繩牀懸那得老僧同說餅壯歲已過訝抱孫
仍啜香臺一甌茗低徊欲噪林際鴉更尋南鄰初地靜
水精域裏欣慕生禪理貿然金在礦天童老人夙所欽
詎意空堂覩畱影龕前再拜思皈依如汲深泉乏修綆
起登佛閣臨沙灣雲水瀾漫與天永無終山色拂地來

儼對佳人晚粧靚言歸衙齋閉戶吟簿書且喜早春屏
側理狂草作蛇盤臘梅吹香燈炯炯此情惟有朱髯知
寧顧傍人怒生瘦

春日過水月菴同悔人用阮亭少詹壁間韻

時攜錢舜舉杜

丹卷同觀

霽景佳甚停風沙首春遊屐趁放衙寶坊城隅不數武
清泉疎樹飄香花追隨上客愛幽絕琴尊聊共開士家
閒房沈約有題字謂釋堂宮詹疥壁誰使參塗鴉雲溪名筆出
行篋棊几爛熳畱奇葩殘陽數尺挂籬落僧雛屢進雷
鳴茶高歌起舞逞狂態法鼓取作漁陽撾禪棲遲暮學

摩詰背癢奚事麻姑爬南湖蓑笠故無恙引領天末生
咨嗟黃昏約略還小住女牆一抹明輕霞

送李孝菴太守之官遵義二首

隨牒天涯去邊烽乍息時山川夜郎國風物竹王祠露
冕春行好銜杯別恨滋諸侯看負弩棘道擁旌旗
離席畱殘雪驅車趁曉鶯少年爲郡日遠道送君情蒟
醬憐行賈巴童勸耦耕文翁遺範在早晚聽休聲

過河曲精舍同悔人分賦二首

長河環古堞別浦映疎林策杖迴隄去聞鐘初地深杉
爐燒鴨脚菜几玩來禽不淺滄洲趣閒房起越吟

春淺冰花結寒光滿竹扉一僧開逕老千嶂隔林微種
菜宜煙渚撈鰕羨草衣他時芟梁上好把碧筒揮

盤山拙公以野蔬見寄次韻荅之

蔬名杏葉豆葉豆葉
惟盤山與匡廬有之

柔條纖葉碧叅黃春礪幽姿泫露光小摘雲林扶短杖
遠馳瑤草侑盈筐種疑上苑花時見菹憶廬山雨夜嘗
榆肉楮雞誰得似殷勤眞費道人糧

附前題次韻

至

沙柳輕盈弄淺黃盤山二月好風光犬牙鵝管苗穿
土鼠耳牛脣翠落筐錦字裁成香共遠雲廚分至味
初嘗只綠蘭蕙同幽契費卻青溝十日糧

春日憶淥波村用至兒韻

幾載春風憶敝廬
黏天雲水望來虛
何時放鴨亭邊去
紅藕花中罩白魚

附原韻

至

楊柳參差恰覆廬
淥波村裏綠陰疎
輕舸小坐春風暖
好釣胎鰕孕子魚

又前題

料得西村春水肥
蒲青日暖燕爭飛
憑誰寫出煙波景
著我持竿坐釣磯

春日書懷用竹垞檢討柳巷杏花歌韻

昔我遊雙江
匡廬九疊往復經
扁舟泛彭蠡
如鳥張修翎
忽忽回頭已七載
孤篷還憶泊落星
竭來客通路
杖不扶郊垆
簿書攬晨夕
安得愁懷醒
春光九十隨手過
如鞞桃萼嗟飄零
婪尾行欲放
送花想園丁
漫堂天陰對圖畫
尺幅徒愛遙山青
牆隅疎柳手所種
穉生金線紛婷婷
參差石竹侵檻碧
灌溉時自攜銅鉞
朝來鄉心不可按
側身南望放鴨亭
荷錢鋪水葦
抽筍雙漿正好尋
清冷冶遊豈必羨
吳會竹輿嘔啞闐
支硎江湖蓑笠故無恙
一聲漁笛何時聽
寄書兒曹課種竹
繞屋他日看玲嶰
南榮鐻白亦良苦
觀河吾自憎
吾形隔城迴帆

宋氏續言金鑑卷五
七
聞搗鼓輕煙一抹連沙汀閉門科頭恣吟嘯氤氳香篆
畱牕櫺盤空硬句寫胸臆吏人欲進仍須停黃昏微颺
響林末楊花如雪吹冥冥

附前題次韻

至

余也從識字終歲守一經偃蹇三十餘野鶴凋修翎
南下雙江北榆塞年華瞥過如飛星邇來客帝里
結伴尋林垞東風妙駘蕩吹我宿酒醒盤山雲起橫
雨脚廉纖小雨向夕零畦蔬燦新綠剪掇煩園丁威
紆柳巷入佳勝小麥翻浪何青青杏萼初試雜紅白
己花未花渾娉婷道傍輓轡汲深井一木上下懸雙

餅辛勤灌溉走野老聊避風雨來茅亭賞心只此不
在遠慶豐插水清泠泠詩思忽動快迎刃庖丁之刀
新發硎風光到眼慊夙願布穀催種還堪聽路上小
兒競導客插花滿帽行鈴屨嗟我骨相宜藪澤胡乃
奔走勞其形佇看鷗鳥殊浴漾朝飛暮宿依沙汀淥
波村遙空凝睇緯蕭卻憶當牕櫺人生有志苦難慰
日居月諸無時停會須鼓棹下梁苑藕花十里煙冥

冥

過樓桑村謁漢昭烈廟

弓遺白帝志難償正統千秋自蜀疆古廟巋然當獨鹿

新枝沃若發樓桑雲旂羽箭關張侍網戶虛檐鳥雀翔
讀罷迎神碑上曲梓花開落又斜陽

夏日過礦山寺

松蔭接迴岡禪關隱夕陽杖尋樵子路衣解贊公房雲
壑當牕邃山泉貯鉢涼自憐同倦馬暫得謝羈韁

石盆峪龍潭歌用歐陽公晉祠韻

石匣鎮南十里閒石盆之峪流潺潺我來策馬亂石路
兩峰合處窮其源微颺披拂瀑花落玉潭如鏡籠山煙
岸傍遺廟有短碣南塘題句幾平聲百年謂威大將軍僧言神物
此窟宅恆從萬丈驚盤旋少陵小虵詫為雨靈異今又

聞塞垣坡陀趺坐面澄澈囂塵自訝凋朱顏時方苦旱
向龍禱願一欠伸滋枯田輕綃瞥見曳潭底雲雷恍惚
騰迴川擬歌迎神送神曲歲時伏臘被管絃言歸驛路
轂相擊那得耳聽噴薄泉黃昏野店聊竚立風林織月
方娟娟

夏日雨中重過河曲精舍四首

微雨泛輕舠城隅一水遙新荷侵壞道破網挂危橋精
舍花香入空林暑氣消茶瓜風味別齊已坐相邀
瓢笠追隨數菰蘆偃臥清雲威低柳徑燕語會松棚酒
許當牆過詩難擊鉢成淹畱淳朴處真渴侶鷗情

雨急亂波光城闐入渺茫最憐鷗鷺喜倍覺芰荷香豆
莢分僧鉢菱歌度講堂緯蕭無限好惆悵水雲鄉

緯蕭草堂

余家淥波村有

纂纂沿牆棗垂垂滿架瓜僧間勤種植村小護雲沙舊
雨掀髯失憶悔人新愁對酒加衝泥歸路晚任笑接羅斜

附前題次韻二首

至

水漲集漁舫蒲荒細路遙看花綠臥柳覓句立敲橋
渚靜煙常護林昏雨未消老僧如病鶴沙岸喜相邀
門市漕河水禪堂竹樹清花香隨屐齒匏蔓絡松棚
僻地塵難到匡牀夢易成掀髯東浦客吟望倍含情

寄悔人

河曲重遊暮雨時都亭雲樹倍相思掀髯大似緣坡竹
古寺青燈獨咏詩

雪園五哀詩有序

往余鄉有雪園社即江南之復社也改革後先
輩凋喪余從侯子朝宗賈子靜子三徐子恭士
邇黃來玉復修為六子社詳朝宗所作社序今
五子先後俱歸泉壤而余以薄宦日益潦倒慨
想故人潸然出涕爰為雪園五哀詩以代招魂
之賦云爾

侯朝宗

朝宗天人姿才大不可囿文起八代衰所遇屢顛覆當

謂太常司徒司成三公

聞見亦良

其弱冠日英名振華胄兩世東林魁

徐霖蒼吳讓伯延仲

哲兄

富落筆五嶽搖十手寫難副徐吳盡儒宗

長華赤社

亦耆舊壇坫與周旋不及君馳驟江南復社興陳夏

維領袖應社起雪園

雪園社亦號應社

遙託芝蘭臭君似孔文舉

高義傾宇宙無何丁喪亂江表避羣寇奇策棄汴京懷

抱莫能售抵掌公卿閒如獅震百獸金陵飛尺書跋扈

為之逗清流遭側目禍自皖城構艱難歎備嘗播遷匿

巖岫歸來志未頽藻思日益茂慷慨慕魏武霸氣得天

授橫槊襟期同兼有陳思秀中原已冠軍麟鳳網還漏

鬼物若擲揄功名苦不就鄉曲諸小兒那解洪鐘扣壯

悔額其堂理學將深究嗟哉中道摧身死文則壽遺編

炳日星遠近餅金購邯鄲學步多靡不君俎豆余荷獎

藉殷文字煩糾繆何異爨下桐適與中郎構六子結同

聲雅歌快迭奏生平知己感淚漬衣裳透荏苒三十年

寸衷自銘鏤輓詩久不成念之心恆疚三復贈我書平

原買絲繡

賈靜子

世亂奇士生調高衆人訝賈生不羈才名豈長沙亞年

少賦雪園文彩凌鮑謝灑落萬斛泉珊瑚為筆架講院
聚羣英君實冠同舍太守鄭公三俊重修范文正公書院招諸名士讀書其中君每試必冠軍廿載落魄

餘奎宿恆遭罵上書請修史言大而非詐時危任轉蓬

南渡傳聲價雄藩開幕府書記特相藉雙刀賈生之目雙刀展兒嬉時有

平幸未死江夏歲晚返舊丘渦河親耕稼究心二氏中

草衣還布帕欽寄笑侯嬴作書屢彈射風期自翛然

寄人籬下君本余父交藝苑欣邀迓小友辱忘形曹鄴

附五霸遯園君別業數追陪倡和無少暇策略用世心清言

佐杯竿君有策略清言諸書進道迨老年故態一朝卸信乎侯生云

羊質善變化易簣曾目覩從容謝驚怕如此干雲姿寧
教腐鼠嚇所嗟似續無上塚誰觴炙感舊起悲吟臨風
淚傾瀉

徐恭士

恭士恭而傲矯矯雲間鶴斯人忽九原書來心驚愕痛

哭念平生音塵恍如昨精悍眉宇畱骨相何磊落難兄

曰霖蒼聲名等李郭之子稍後起旗鼓相參錯文筆追

臨川構思必精鑿書法鍾張流人號古釵脚作詩屢易

稟清新吐糟粕早篤二吳交晚踐六子約朝宗推畏友

篇什勞刪削一字數推敲諫官謝謇諤維酒雅無量雄

談侑康爵立身迥巉巖對客展戲謔吾徒科名艱獨君
薦一鶚世稱真孝廉自顧亦不忤遊梁計與陳甫草其年地主
皆君託歸然魯靈光峻望比廬霍老偕余季遊余弟介子共耽
林泉樂人事莽推遷一旦舟移壑余失聯牀歡君有掛
劍作懷友疾莫瘳平臺頓埋玉叶老成盡凋傷風騷歎
寂寞天涯賦大招屋梁月華白

徐邇黃

高士推南州邇黃其苗裔絃誦甕牖中行潔色頗厲惟
操三寸管清芬播蘭蕙弱齡爲諸生揣摩工應制遠攀
陳羅旗近接劉張袂干之伊人顧盼取卿相勳猷將策勵賦命

何軾軻終身艱一第吾黨得應求鶴洲共談藝晚好性
命言濂洛託深契教授聚生徒白板門恆閉窮年手鈔
書字如蟻蝨細埋頭向簡編髯落氣彌銳執鞭蘇門翁
謂孫徵君高踪信堪繼方幸文獻畱哲人倏棄世遺編伯倫搜
山蔚同學中丞涕潛菴傳經賴侯芭謂田梁紫我菴詎云替君有我菴語錄遠
道未撫棺幾載悲思繫秋風忽愴懷寥天聞鶴唳

徐來玉

雪園諸君子高曠慕晉人侯賈千載士恆遭鄉里嗔懿
哉來玉氏儒雅殊彬彬胸中少鱗甲選言務去陳豐頤
表微髭貌朴情彌真揖讓有恆度邂逅歎飲醇惟從良

燕會論文昂其脣恭士愛小阮相對如嘉賓君時已白
首左右奉幅巾六逸皆澹蕩與結煙霞鄰隨牒官上蔡
鄭虔乃等倫一羶臥未穩還歸南湖濱長嘯尋舊好吾
自安吾貧首丘願良遂鵬鳥來承塵無兒感伯道著作
空千春雍門有深慟況此金玉身何日磨鏡去孤墳披
荆榛作詩效八哀淚灑通潞津

新秋雨後悔人書來將偕諸公爲河曲精舍之遊

賦此奉遲用兒至七夕後一日同悔人京邸小
飲以立秋日爲韻三首

一雨驅炎烝門館涼颼入烏几發鑑光鳳味翻墨汁懷

人時悵而起向寥天立惟髯洵絕倫何日手同執慶豐
牖流飛淙潺幽響急畱取官焙香澄碧同君汲曰余總
勞勞猶堪馬鞭揖

連宵有歸夢西村歌飯牛曉來坐茅宇高槐影修修雲
物蕭以澹沖襟宜新秋故人枉芳訊將訂河曲遊芟梁
足野趣雙林風颼颼願從梵唄罷摘藻偕英流瓶鉢借
老衲還買鴨觜舟

愛尋荒寂區自笑林丘質偃仰千載心惜此半檐日洩
洩父子閒矢口談聲律蓮社有勝招矯首忘盥櫛夙耽
文酒歡如啖仲殊蜜閒房畱妙香想像開書帙籬落綴

豆花斜日鳴蟋蟀

附原韻三首

至

曉來官閣清荷風扇秋入白袷迎新涼瓦甌啜茗汁
懷人面西岑空階聊竚立我馬已夙芻吟鞭喜早執
去去達都亭驛路蟬響急素心東浦翁掀髯呼晨汲
開門見我來槐陰一高揖

僧舍環積水壞壁行蝸牛槐花漸簌簌竹枝亦修修

趺坐共茶話所言各千秋余吟新齋句

時讀余司農新齋倡和詩

君訂

河曲遊

悔人訂與藥亭石虹為河曲詩會

微雲卷日夕過雨風颼颼披襟

一仰望大火驚西流何當賦歸去放鴨尋輕舟

余家淥波村有

放鴨亭

陳子

仲夔

南國彥矯矯鸞鶴質哲人結同歡投贈無虛

日晚攜一卷來過予談聲律七夕有短章字句妙比

櫛蔬筍分僧廚佐酒甘如蜜夜深風物清露下霑書

帙握手送客歸屋角鳴蟋蟀

題王翬畫

疎林開逕曲遠岫帶村孤粉本余曾見浮嵐暖翠圖

題董文敏仙巖圖

獅子林推倪迂叟青弁圖誇王叔明文敏仙巖禿筆畫

何妨異代聯鑣行

宋氏續言金卷五
衙齋絕無蟋蟀命小童覓而放之籬下嘖然有作
庭樹蕭條逕草豐如何秋至少鳴蟲古人觀蟻空階上
今我添蛩小院中似訴似啼當社日在牀在戶念豳風
放衙自笑真無賴分取秋聲到菊叢

遙送曹實菴之官新安十首選八

舍人佐郡去江鄉山水登臨志許償薄宦蹉跎成白首
曹唐端不異馮唐

健筆如君鼎可扛一麾南國咏澄江秋風驛路青衫去
好看參天石筍砭

文章宿老困西清曲巷柴門歲月更多故人畱史局

獨驅羸馬出承明

寫意開心十四年都亭咫尺悵風煙相思更倚南雲望
白嶽黃山落日邊

當年十子重京華舊雨晨星幾歎嗟勝事祇今忘不得
寒宵聯句鼓三撾

砂泉香潔自淙淙浴罷還尋萬仞峰千歲老猿何處覓
月明多挂擾龍松

雙江奉使君懷我歛浦之官我送君何時會合還題句
醉墨從教寫練裙

想像河橋酒幔青離歌低唱耐人聽前途一事堪怡悅

南海新篇索阮亭

時王阮亭少詹自南海返命

秋日過南溪寺恭步先文康原韻

先人開府地重此課桑麻野寺疎鐘在長河落照斜
巡檐容和句灑淚罷呼茶依舊門前柳西風繫釣艖

附前題次韻

至

探幽過廢寺野外徧蓬麻活水當秋急層城入望斜
桐花垂暮雨蓮蕊泛僧茶王父遺詩在長吟泊釣艖
春日重過南溪寺絕句

淡墨雲鱗卵色天晴郊煙柳已三眠尋春愛就南溪
寺詩版閒吟又一年

題王黃湄都諫過嶺集即用集中惶恐灘寄悔人韻

黃門千載人詩骨太華聳獨操三寸管藝苑闢荒茸銜
命嶺嶠遊雙江接余踵鷓鴣增旅懷況復聞秋蜚贛石
虎牙撐偏鬪驚湍涌三板泊危灘卽境堪惶恐羨君賦
停雲岸幘旌麾擁奇思鉢腎肝刻畫松毛毳陰巖松毛毳黃湄句縱
橫其誰敵所向鏟坡隴牛腰傳卷軸心折手還拱周旋
愧莒邾願以敦盤奉雲霄鷓鴣姿斯事乃餘勇

重過遵化練泉恭步先文康韻有序

遵化城東北隅有泉澄澈流周於隍舊名烏龍

先文康開府畿東時易名曰練暇日築亭種樹
與賓客泛舟遊宴其間曾有泉上作後入相諸
將士置酒餞別公復畱斷句一首刻石置泉上
時爲順治二年犖方稚齡今康熙二十二年犖
奉命觀察通永明年二月按部過遵尋訪舊
跡而泉以地震涸久矣因次斷句韻有方塘無
復舊泉音之句又明年復過其地泉忽涌出頓
還舊觀邦人士亦驚喜共事修葺犖畱連久之
爰次泉上作原韻勒諸貞珉以誌今昔之感
先人漁陽擁節旄我今重來駐畿甸山城訪舊空亭畱

不見清泉照人面古隍庚庚龜兆橫千畝安能灌卮茜
獨倚怪石弔斜陽忍對長松自蔥蒨今年一事出意表
壞甃依然明匹練迴溪鬻沸得舊觀幽響臨風傳別院
縛橋設檻走士人輿隸驚看亦云便昔如黃犢今霜髭
插腳誰知此開宴何戡歌發感客心況復林端山鷓轉
載尋邃洞剪煙蘿苔蘚封門青一片顧瞻先澤矢淵冰
求莫敢言黔首賤摩挲斷碑景遺編口沫手胝咏百徧
回首霜月到方塘依稀諸將當年餞

附
前題次韻

至

我家祖父宦遊奇先後接踵來畿甸潞沙之東古無

終五峰峯峇當北面有泉活活傍城隈紅霞射水水
如茜文康舊迹餘雙亭翳以蒼松何蔥蒨小子從觀
及暮春波光一望驚江練蘆荻風生客衣涼木魚粥
鼓聞禪院僧言是地盤烏龍蒲池亦在遵化涓涓未足善當
年詩版已無存殘碑猶勒中丞宴泉上有宋中丞宴客處碑微雲澹沲
起遙汀沙鳥迎人時一轉女牆高處紛野花迴颺吹
落還片片人生只此足幽棲鹿鹿徒使青山賤吾欲
掉頭謝塵寰布襪棕鞵從茲徧好懷應亦鑒清流五
嶽遊踪豈待餞

寄楞嚴經與拙公

小卷楞嚴寶座隅看來宋槧未應殊微文大義無須問
寄與山僧覆醬瓿

何次德見過漫堂感賦

廚俊英游幸拍肩侯羸鞭弭共周旋青衫岐路仍遺老
白首重逢話往年柳暗隋堤花是雪月明筵步酒如泉
雲煙過眼嗟三紀疎雨孤檠一惘然曩次德遊梁主侯朝宗家
余同雪園諸子賦詩送之

後遇於金陵與周櫟園袁籜菴諸公燕集
秦淮丁繼之水閣今屈指三十餘年矣

題周鼎高秋翫月圖

高臺何突兀環以青梧桐遙天涌圓月煙景開朦朧片
雲掃無迹庶免滓太空誰其快登眺提攜兩詩翁琴樽

亦不設倚檻惟孤童顧此三尺練颯颯生秋風古來貌
夜山妙手推克恭卓哉秣陵叟走筆追前蹤衙齋挂晴
晝清輝照簾櫳掉頭拋俗韻置身丘壑中幽人不我棄
霞外偕支筇

秋日同蔣京少重遊河曲精舍用月泉吟社韻卽

送京少還江南

幾度溪頭看藕花芰梁微雨坐浮瓜重遊忽聽潞沙鴈
初地同傾陽羨茶案展晴嵐消放梵時觀石田畫卷籬侵淥水罷
停車風前一曲送歸客怡悵煙江颿影斜

晚坐漫堂畱京少小飲仍用前韻

漫堂三見放蘋花隨手年光已及瓜薄宦真同秋社燕

奧香聊試武卮茶

武卮山小九曲有奧香茶

聯吟莎柵堪扛鼎送客蒲颿

可當車漚酒一杯君且住高槐突兀月敲斜

鷄泉校射歌上大中丞于公八首選五

旌旆悠悠映碧空秋原校射快從公手柔弓燥雍容甚
不少襄陽太傅風

鷄距清泉遶郭斜琮潺幽響雨餘加今朝小隊經行處
應號迴溪作浣花

桓桓使相坐平臯破的風前寄興豪夾道千人瞻畫戟
我公丰采太行高

寒衣約略喚漁舟容與微波得勝遊
鏡吹欲傳還小住兼葭深處有眠鷗
如笠孤亭俯礪光擬添欄檻種垂楊
甘苦自來同將士當筵斟酌散魚湯

上谷謁楊椒山先生祠次魏司寇環溪先生壁間

韻

椒山峻與太行同謇諤居然折檻風
曲突豈惟彈馬市傷心終使媿龍逢
清霜氣結臨刑句赤日光留未了忠
魂魄自來思故里渚蘋殷薦廢祠中

歷盡艱危謫遠方還將一死震巖廊
批鱗目已無丞相

列俎人爭拜奉常夢裏笙鏞元有志
街頭枷鎖任飄香靈風蕭颯鬢如戟
庭舞神鴉老檜蒼

讀康對山武功志題卷尾二絕句

絕代風流康對山琵琶一擲老秦關
千秋邑乘畱殘帙簡潔居然並馬班

有爨風物七篇中騷筆由來撰述工
太息斯人甘廢棄交情端祇篤崆峒

爲陳藹公題傅青主徵君村居圖次青主原韻

水石明素練觸迓江湖心高士寫平遠
妙蹟追雲林村居寄寥廓一半煙靄沉
竭來斗室內忽覩郎山岑幽人

時危坐耳畔流清音

藹公家上
谷近郎山

冬夜漫堂文宴同王令貽用章八元新安江行韻

舫齋依老樹有客偶維梢笈簪懷漁具蒲團愧鳥巢

壁懸

石溪道人
鳥巢圖

杯深孤月晃屏曲凍梅交一段婆娑興將無候

吏嘲

太學石鼓歌用蘇子瞻原韻和王令貽張弘蘧

我髮未燥心好奇周宣獵碣詢遺叟執經曾爲國子生
屢肅衣冠戟門走嶙峋驚覩石鼓文欲讀牴牾難上口
累朝考究窘鉅公矧我生當千載後樸質輪囷列仍十
古蹟剝蝕載維九臨池學書眇蟣蝨筋骨徒教誇顏柳

嗒然對此喪所懷昂首高天爛箕斗我車我馬辨不易
畫肚移時動右肘繽紛光景浮雲歆隸楷俗書掃稂莠
強尋邊旁鬱深衷乍測奧義呼良友臥度卯酉推索艱
如趙武靈探穀穀憶昔中興蒐岐陽紀績銘功勒蚪蚪
歌辭烜赫躋雅頌從臣撰述定耆耆或云羸氏或宇文
異議相沿誰所嗾天雷重器登成均壓倒犧樽與鬯白
趨蹌上舍勤俊髦想像歌工煩矇眊金石刻畫蛟鼉盤
聖作歸然並响嘯竭來摩抄儼落星元氣淋漓蘚花厚
昌黎子瞻遞咏歎音訓豐碑表某某蹉跎三紀緬神物
光怪羅胸詫希有厭親簿領謝文翰忍見庭除設械杻

拓本寓目心一洗斯邈以還等瓦狗陳倉淪棄鳳翔遷
日炙火燒存亦偶流傳奕禩位置妥蹲鴟排比齊其首
曰窠曾憐任春榆牧豎幾遭來擊培縱經鄭重金玉鏤
播蕩戈鋌旋剔取嗟哉顯晦固有時至寶終難辱埃垢
出之泥草獻清廟祭酒先生昭世守江左兩生韓蘇才
鞭撻風騷若拉朽石鼓之歌欲和難應附此石千萬壽

西陂雜詠

有序

余家西陂去宋城數里而近魚藕菱芡亘延於
隋堤南湖有江南之勝老屋數間麤庇風雨擬
號所居爲淶波村爲釣家而堂以緯蕭菴以和

松各村之外縛芟梁築放鴨亭蓋躊躇數年於
茲矣顧宦遊四方僅託諸夢想暇日爲西陂雜
詠屬和者纍纍更乞虞山王翬寫爲圖裝而藏
之篋中俟異日歸老補葺焉昔劉克莊欲構後
村精舍以周旋世故終未能插一椽施一鏹以
爲浩歎卽陳北山所書精舍字亦付之蛛網蟲
蝕而已則余於今日豈可僅託之圖與詩致令
有後村之歎也康熙丙寅仲冬廿有九日書於
潞沙官舍之漫堂

淶波村

芳洲魚麥多全家就來久門巷渚花叅眠食溪禽友決
決淨兼天色映五株柳

釣家

已作煙波徒占斷煙波境籬根一綸竿檐隙雙笳管時
鼓鴨觜船長歌逐落景

緯蕭草堂

蟹舍秋風吹荻枝堅可截織薄衡茅閒暫把魚經輟偃
仰幽事多好待鹿門說

和松菴

髯翁蔭詩屋蕭瑟如空山長風拂虬枝天際來潺湲操

絃那能和此曲非人間

芰梁

水栗紛橫塘遠接撈鰕步采采刺我衣平橋踏涼露竚
立聞荷香月挂迴堤樹

放鴨亭

鳧泛殊容與銜苔弄溪沙空亭鎮相向何須能言誇風
標兩公子伴爾棲蒹葭

杜牧之晚晴賦白鷺潛
來兮邈風標之公子

宋氏綿津詩鈔卷五終

宋氏綿津詩鈔卷六

濟南雜詩九首

濟南城北兩峰殊積翠凌空過小孤怪道相看如故友

鵲華秋色舊披圖

曾見趙文敏鵲華秋色圖

鵲華橋上每停車尤愛新晴返照餘城裏看山惟此地

真成手弄玉芙蓉

脣涕驚看趵突泉來從王屋世爭傳署書畱得 君王

筆不數鷗波七字篇

濟南人說勝江南菱葉荷花戶牖參無數山光收不起
月明染得水拖藍

歷亭風物妙清秋湖水湖煙極望浮多少新詩容疥壁
杜陵碑版不曾畱

真箇南山碧玉環我來半載阻躋攀畱著勝遊他日裏

祇應詩識是遺山

元遺山詩畱著南山更一游

聽事前頭古柏多高槐幾樹更婆娑西風一陣吹黃葉
露出南山兩碧螺

風雅從來有廢興濟南當日氣憑陵誰知天畔峨眉雪
又作禪門退院僧

水門偶讀南豐記厄井頻過大舜祠故疾未逢鰕蟹發

齊州六月不題詩

余宦濟南半載頻行始得此數詩

附前題選五

至

湖光澹澹水沉沉坐向澄湖自在吟十里枯荷連敗
葦沙鷗一對點波心

如笠孤亭一水湄溪聲納納晚風吹濟南自古多名
士徙倚空階有所思

信是名山見欲狂鵲華橋畔立斜陽高峰插處渾明

滅圖書真勞趙子昂

趙有鵲華秋色圖

白雪樓頭共往還杜康泉上快追攀世人好事無如
我數盡城南簇簇山

羣峰匝匝水泓涵載酒支筇次第探屈指溪山誰似

此濟南端不讓江南

峒嵒

鴈影落霜蕪驚心歲欲徂長途驅欵段斜日過峒嵒蒼
莽江淮近消沉楚漢俱勞歌聞瓠子河上一踟躕

題王澹游歲寒三友卷

文牒紛座右埋頭困神明偶一對圖史頓令耳目清朝
來得寶軸古錦裝池精黃華老人子實維北地英三友
名頗襲逸筆殊縱橫髯翁聳而立龍鱗腹彭亨修篁帶
蒼煙數枝森相迎更貌江南花苞綻幽香縈瀟灑拔俗
懷誰能及此儻倪迂訝高脫王蒙說手生上智得神解

妙語非譏評摩挲廢眠食嗒然坐前楹收卷忽一笑學
道須忘情

早飯姊妹橋

霜橋踏去耐春寒菴裏人家作畫看索墅地名疎林參戶

外茅山空翠落檐端吟情不屬憐隨牒歸夢難成笑據

鞍此日朝衫真可脫頻將苦筍入盤餐山谷贈東坡詩云君如
端為苦筍歸朝衫

脫應可

附前題次韻

至

春風拂拂客衣寒的歷山花取次看小艇衝煙過渡
口雙鳩呼雨下林端田家酒熟忙開社村落泥融倦

倚鞍草具漫嫌滋味薄由來麤糲是吾餐

秣陵關避雨

奔濤側耳萬松閒不覺穿林驀塢艱急雨遠來靈谷寺
行人小憩秣陵關琮潺流水頻驚馬斷續殘雲苦戀山
剩有城南聯句樂宦情鄉思頓教刪

附前題次韻

至

秣陵古道竹松閒石勢參差著屐艱遶屋流澌爭灑
灑占沙浴鳥弄關關畊餘稚子驅黃犢雨過殘陽掛
碧山健筆喜看張籍在謂張博山聯吟好把旅愁刪

虎丘山後僧舍看玉蘭用東坡遊道場山何山韻

扁舟曲港循山麓爲覓芳春入空谷禪關寂歷小院幽
一樹繁葩看不足雪塔矗立白漫漫柔枝亦作蒼虬盤
清香縹緲徧法界餘英散落隨驚湍別院高樓花外出
倚欄相對容展席玲瓏映日訝神功輪囷臨風想初植
遙峰林隙聳翠鬟點綴總入圖畫閒春光淡沲蜂作陣
騁懷豈必千重山吏事輻輳夜達旦忽復三春已過半
纔愜勝賞又言歸嚼蕊攀條起長歎

夏日同蔡九霞王勤中姜學在兒至遊支硎華山

用元遺山天涯山韻

昔我觀海行斥鹵更訪秦岱經鄒魯江南山水不得遊

日日相對惟阿堵瀕行始鼓一棹來首路楓橋名最古
支硎山色呈遙青一半朝陽一半雨竹輿嘔啞凌陂陀
梔子萱花相媚媼支公亭廢尋馬櫪旋螺菴幽憩梅圃
提攜上客千載人翰墨之英文字府冲襟已將瀑布濯
短策還向華山舉泉噴鳥道怪石多象馬瞿塘何足數
影畱丈室弔蘖菴僧話行滕歷天姥薄暮佛巖縱遐眺
萬樹青松不見土臨風長嘯谷響應定有清詩出歌舞
呼兒題名繼凡夫綿津山人牧仲甫

禦變詩

有序

康熙二十七年夏六月余奉

命撫江西舟次

蕪湖聞楚北兵譁江西震恐急鼓棹入南昌撫
慰之蒞事未十日於月晦有姦徒李美玉袁大
相句結楚逆以酉字帖潛授其黨多人將於詰
朝謀爲不軌賴 聖天子威德偵知姦謀乘夜
計擒二元惡旦卽斬首懸藁街餘黨盡鳥獸散
亂遂以平其事詳劉榛記中暇日賦此用存崖
略云

聖皇二十有七載臣榮承 命撫洪州爰從茂苑歷建
業溯流直泛長江舟時丁盛暑南風發江干晨夕阻石
尤忽聞鄂渚兵脫籍倡亂一旦據上游二十餘城倏陷

賊烽傳浦激驚眠鷗殘黎絡繹蔽江下船如蟻蝨排荒
洲我禱馬當得風助小孤彭郎無停畱蒞事人心稍安
戢詰戎籌餉綏四陬孰知十日突生變羆羆遠結封狼
謀實維六月之晦日螳臂敢與大邦讎須臾風鶴徧城
闕婦女奔竄聲咿叻厥黨無算暗句致洶洶之勢未易
收夜以計擒二傑惡繫頸不異當檻猴詰朝秉鉞正
國典碧油幢下懸其頭俄頃姦徒鳥獸散十三郡始安
鋤耨捷書一紙報 天子宵旰庶寬南顧憂故人千秋
推作者濡筆記事昌黎儔新建英猷詎敢望銅梁取況
增之羞或以張肖甫定浙亂相况沃民勿緩正有事藥石語佩西園劉附劉

榛記略先是楚有去籍之卒踞山要餉撫軍柯公永昇易之遣十餘騎往擊卒遂
板公及叅政葉公映樞同日死妖燄縱橫連破二十餘城勢洶洶不可知會先生受
撫西江之命密邇寇氛人情蠢然先生飛檣入境靜以鎮其搖撼誠以收其心
脅嚴以飭其戎行明以申其賞罰浹旬而秩然有備矣六月之晦有李美玉袁大
相者裂紙書酉字為符句結城內外三千人約詰旦礮舉而行事先生聞變乘夜
授方略密擒二人以來詰之則直吐不諱僚屬惶惶城中士女半遁鄣下士甲而
坐不敢寐先生高眠徹曉從容起三榻三吹升堂一切如常朔儀畢再鞫二人無
異辭命中軍遊擊詹英奉 天子所賜節兩力士綠帔首捉刀擁二人出西轅門
外立斬之即張信示曰倡亂者已誅餘不復問其黨俟二人指揮如約日高不見
俄聞中丞門礮鳴而二人之首已懸藁街矣眾乃疑神疑鬼不知發露之自而豕
驚魚散四境帖然以寧設使是時需不先發怯不早斷寇一舉而西連於楚聲勢
互倚警及百粵遺 廟堂之憂不知如何矣而談笑定之楚亦以平伊誰之功哉

過北蘭寺四首

霽景開南浦秋郊訪北蘭沙堤延野色竹隴瞰江湍妙
相拈花示禪心即境安平生端有異興發是林巒
豆棚連曲牖竹逕轉虛堂圖史心無著茶瓜味總長觀

泉嗟面皺踏閣愛山蒼白袷憑欄處松風作意涼

山脊孤亭峙荒寒傍棟林苔文隨展席鳥語應調琴偃

仰消兵候低徊望 闕心劫灰僧話久磬響夕陽沉

別圃從容過迴岡更有亭沙痕浮日白山色印江青列

岫承餘韻是地舊有列岫亭支頤感客星無須催小隊漁唱暮堪

聽

附前題

至

刹竿隱隱傍荒岑坦步遙穿棟子林僧徑渾依頽岸

轉梵聲恰竝夕陽沉煙籠寒水江流碧霜老香橙樹

挂金縱目還同登小閣西山嵐影落衣襟

別張長人十九年矣遠道新篇見贈依韻奉答

蝶夢蘧蘧感歲年每逢秋鴈望書傳梅川丰格誰堪擬

魯壁靈光世共憐品墨雪堂疎雨夜捫碑赤鼻晚風前

詩來又得題襟樂依舊低頭願執鞭

秋日雜興疊北蘭寺韻寄示姪起四首

帶露收園橘臨風徙盜蘭庭空餘豆架籟遠殺江湍退

食初心在聞鐘噩夢安何當乘暇日取次問煙巒

鈴閣幽閒地依然號漫堂節旄肩不易饘粥味何長帖

訝漏痕古圖披松鬣蒼尋常分俸得宦況未蕭涼偶得吳說手簡

王蒙畫

鞭弭憐廝養風騷拜士林撫時思害馬行藥偶攜琴懷
古江濱閣餐英歲暮心浦鷗閒似我元不問升沈
昨日東湖曲行歌孺子亭汀煙涵月白梁芰入秋青輦
路疎書遞霜波照鬢星題詩寄小阮賓鴈幾迴聽

漫堂咏物六首

小靈壁研山

磬石黝以奇萃律傍硯匣髹几發翠嵐盈咫羅巫峽方
之小九華幽賞未云乏

宣銅鹿書鎮

小物鑪之餘厥質十二鍊攸伏貌來殊寶色朱櫻絢風

牀罷攤書應同辟邪薦

大食索耳茶盃

愛茲海國陶彷彿卯色天索耳樸愈妙官哥寧比肩奧
香泛永夜詩思來悠然

小華道人一池春綠墨

隄麋媚分宜萬杵光奕奕春綠象曲池品欲加尺璧冰
壺秋月胸磨啜亦何惜

何雪漁凍章

鐫無非
佛事字

雪漁運鐵筆邈焉追羸政片石粟以溫摩抄得繕性玉
局昔有言玩之足去病

東坡與元章云臥閱
四印奇古失病所在

倭漆桃香盒

鷗翎騰鑑光奩具有黃金泥映螺彩遙從海嶠分龍
涎宜爾貯果園奚足云

附前題次韻六首

至

小靈壁研山

華嶽疑無根縮之傍研匣峰峰儼芙蓉那復羨巫峽
終朝八案閒煙雲未嘗乏

宣銅鹿書鎮

彼林而游者胡爲臥紙上肖形工拙閒古色信難狀
推卷偶停目想見銜花餉

大食索耳茶盃

昔聞大食瓶今見大食卮輕脰中外徹兩耳如索垂
玩罷一彈指磬響音遲遲

小華道人一池春綠墨

圓璧經二寸蟠螭伏春波小華昔倣古萬杵香煙和
倘非莊騷筆未許臨池磨

何雪漁凍章

短章遺雪翁鐫無非佛事石膩如凝脂篆古刀復利
明朝訪山僧好用印投刺

倭漆桃香盒

小物矜彩螺估帆來島嶼桃實何儼然位置博山所
除卻黎人香誰合此中貯

賦得江月滿江城

激灩雲閒月淒其江上城清輝連極浦灝氣逼虛楹竹
露泫時滴林鳥棲復驚沖襟默相對申旦浩歌生

題陸包山梅鳩次原韻

好鳥坐春枝刷羽未成唳暗香襲襲來正結羅浮夢

題王勤中畫用兒至韻

堂上三尺練鞞紋漾晴波垂楊生新稊因風掃圓荷何
來兩黃鳥相喚如和歌彷彿放鴨亭欲佩笳箚過

附原韻

至

老柳發金綫絲絲掃晴波白小驚復定唳水藏圓荷
樹頭兩黃鳥相視調清歌隋家堤邊景納涼記曾過

題錢舜舉三蔬圖三首

白菜

幾年燕京擁地鑪黃芽之羹薦中廚竭來南州食單減
大巢無味薯蕷麤披圖新翠嫩可摘爲菹擬備三冬需
中夜酒罷相如渴先生端祇期冰壺

筍

古煙一抹春雨注解谷蟄龍想騰翥青苔迸地生鈴竈

千尺琅玕錦綉護金鷄嘴斲平臺東風味殊佳懷舊圃
好趁江國爛朱櫻上座聊叅玉版去

蘿蔔

詩人昔賦采葑菲土酥雖賤味則良嚙根萬事皆可就
英雄種菜知何妨雪溪遺老寫生手紙上如拳淨堪剖
深衷抑鬱待爾舒一飽怡然更奚取

附前題一首

至

土酥出土筍脫綉嫩綠初長冰壺生三蔬滋味清復
清甘脆入脣宮徵聲披圖一過客思縈去年十月長
安斫黃魚今年二月吳江調尊羹風味雖佳每不羨

但羨清冷一曲轆轤澆菜常作不足齒之儉

梅仙祠二首

梅尉棲真處山坳半畝塘閒雲開鶴圃修竹護丹房籙
祕三天字花傳七里香花名到來心一洗琴韻滿迴廊
垂釣磯難問橫橋水自流樓臺懸絳節林壑駐華輶地
近洪厓子居宜帛道猷高風聞賣藥吟望思悠悠

元日次劉山蔚韻

鄉心昨夜醉能拋曉色雲山媚近郊幾載承明違伏謁
九天仙樂憶懸匏印生綠字閒鈴閣架引紅薔綴鳥巢
怪道輕裘還欲脫西江風物接南交

附前題次韻

至

鄉思欺人未許拋新年苦憶宋西郊一竿煙水綠於
黛半幅蒲颿輕似匏來往鳧翁爭得食呢喃燕子話
成巢春深景物依然在歸去長吟和故交

宣銅琴爐三十韻

焚香購雅製厥品貴而狹部鼎貌太莊博山韻殊乏宣
廟冶最良文房用維甲質當百鍊精式與七絃合形縮
難動操工巧煩撥蠟欵識逼鍾王雕鐫勞目睫叶陋嗤
朝冠聳色允栗殼雜誚擁祥雲麤奚貝多葉壓遠矚體
匪佻近撫爪欲掐中翠含瓜皮外斑點僧衲柔物帝京

紀贗器吳門法磨洗此僅免奩孟那容狎摩抄鑑避光
細膩肉偏洽潤婉端溪珍秀奪美人頰叶亡蓋熱愈便
疑杯酒將呷特薦選倭盤防觸慎火筴滄水沈若嵐貯
楫柚如匣寶惜元禁籟拂拭經繡袷雖下彼天球詎儕
乎睡鴨傍鐙氣熊熊竝研位恰恰刻論尚愧乳別種自
登閣穎師緬抱攜荀令藏周巾削足樸有稜側耳鑿以
插微薰愛氤氳急響失鏜鞳炷幸謝閨闈供還遠禪榻
偶冷怕深宵常溫宜殘臘聊取膝上橫莫更櫝中納賺
或蘭亭同價終連城荅吟興弄處增鼻觀悟來嗒句擬
石鼎聯盟共彌明歆

附前題用韻

至

宣廟貴薰翫鎚鍊戒纖雜出冶擅奇珍制器邁古法
入目璧逢卞驚心兕離柙桐君號許分朝冠耳啞插
足撐貌頗莊口方手僅匝百金價詎昂七絃益惜乏
夙癖愛收藏索看厭紛沓柴汝脛羞媿鬻蠹媿狎
色冷埋土璞質膩醉姬頰叶薄紅卵膚天硬黃僧子
衲幽燄常蘊腹堅彩時徹叶離陸靡定觀珊瑚攪
梘蠟撥灰爇龍涎調絲遜山峽巾頻就以烘經莫藉
此壓聲久騰 帝京寶喜歸余匣製未滿一斤中可
容三合有字款屬鐫無酒脣欲呷倘遇蔡中郎焦否

指應招清誇傍文史俗幸免閨閣鬪雞缸名齊沉泥
硯品洽髹盤奉宜倭錦囊裏用袂鼓鑄匪為遙鑑別
此云甲淫雨勤自拭活火促僮夾避塵須施籠位几
恆防磕左輔漢玉匙右配果園合諦眎訝爛光欣賞
餞殘臘撫之不成音鏗爾空希荅張燈刻畫吟拈韻
次第押風簾靜垂垂煙篆裊恰恰小物薦明禋升香
足大裕

雪中登滕王閣次多玉巖孝廉韻

章江西望山爲界風急奔濤響砰湃雪中登閣信一奇
水闊雲深迷九派昔年僅過石亭寺未訪滕王恆介介

竭來持節繼閻公天畔褰衣意良快琅邪吟魂儼可招
俗韻憑欄掃纖芥歌舞已散野鶩畱畫棟朱簾幾成敗
徙倚看雪雪愈狂那許羈人堅酒戒臨風悵恨覓遺篇
斷碣消沉失倒薤薄暮蒲颿駛如馬南浦蒼茫去疑隘
逢逢鼉鼓何處鳴震起魚龍驚百怪新詩題壁得未曾
讀罷真成爪爬疥繫余微尚契雲山擬駕籃輿謝機械
匡廬面目霽後看次第閒吟償夙債

附前題次韻

至

十載前赴虔州界輕船三板凌澎湃鬱孤臺上縱高
歡坐瞰章貢來雙派趨庭今客灌嬰城匹馬侵晨過

江介振衣傑閣獨憑欄哀鴈橫空去影快賈舶上下
如傳梭蒲颿葉葉疑浮芥滕王已去繼閻公此地幾
度看成敗臨風把杯起狂歌酩酊何妨破酒戒度雨
雲英白勝綿迎春樹色青於薤緬想王郎受簡時舉
筆直覺江山隘星移物換句尚畱畫耶詩耶吟來怪
於今詞客每登臨定有七言壁上疥伊余才薄常自
憐詩情枯澀天所械偶從瀛海和新篇了卻煙霞一
段債

雪同山蔚賦

效歐陽體不以鹽玉月梨梅練絮銀鶴鷓鷗鷺蝶
飛舞之類爲比仍不使皓潔白素等字卽次原韻

曉起忽訝樹添萼怪道中宵錦衾薄從來南雪不到地

如掌漫空卻大作支派章江歸混茫面目廬山失寥廓
戟門畫角吹劇澀竹屋紙牕光乍爍空階跂足對灑灑
破帽蒙頭殊落落梢欄蕭緘爬沙蟹埋踪寂寞藏丘貉
幽人閉戶或晏眠稚子忍凍時競攫輪困壓折嗟古松
啁啾道飢憐寒雀故人平臺舊賦客遠路看山踏芒屨
冰衙那阻鼓枻興地爐聊共傾杯樂坡老橐鞬與周旋
醉翁號令嚴洗滌擊鉢快意傾泉源聳肩旁搜窮冥漠
三徑滅沒手欲龜一舞縱橫蔗當槩來麩雖慶吟太苦
門外吏人聞而噤

附前題

至

江鄉澤水當堅腹北風吹徹元陰酷濺濺纔驚落瓦
溝灑灑還看敲庭竹飢鳥攫食市樹鳴凍雀引伴綠
牕宿街頭酒價知應昂江邊魚網想當束來牟根深
快藉培狐兔迹顯愁難伏幽人閉戶抱醉眠舟子推
篷祝晴旭喚醒平臺老鄒枚判出匡廬真面目廬汀
畫手不復傳惠崇有蘆汀密雪卷眉山戰筆誰能續東坡有效歐陽體作白戰詩且
喜眼界頓空明獨立高樓恣遐矚

春日遊翠巖寺四首

寺後傳有洪厓子丹井

涉江遵野岸策馬望層巒物候芳春好招尋法界寬衣
涵桃色嫩心洗礪聲寒多謝田家子殷勤夾道看

地自蕭梁闢千年幾廢興斷幢隨洞失傑閣入雲登樹
簇喧黃鳥簷虛挂紫藤晨昏孤磬裏羨殺白頭僧
別院黃茅屋淒清洗鉢泉淙緣剝木走響竝素琴傳玉
版叅初地繩牀借晏眠疎籬蕉影下步屨惜苔錢
越嶺更披榛厓荒古爨堙危橋容坐嘯纖月快迎人燒
藥懷高躅支筇了勝因退尋還有句端不負嘉辰

附前題

至

早起來江干喚船當官渡一帆凌煙波便得川原趣
野岸風日佳平沙宜坦步去去遵畦塘不礙窺魚鷺
徑轉入空林鳴泉齊奔赴遠山俄在前近山已回顧

行望鉢盂峰寺門紅微露亭午到講堂松花簇簇雨
嫩筍如卓錫迸砌生意怒小憩度山坳懸崖看瀑布
雪濤洪井翻靈蹟信匪誤竚立遂移時流光逼日暮
山鳥不知名喧呼頻散聚殷勤謝義公延我僚房住
搔首聞鐘聲月挂峰頭樹

春夜雨後同袁士旦劉山蔚小飲士旦談黃山之
勝出紀遊詩共讀之卽席有作用范石湖登姑
蘇臺避暑韻

紅薔點幽砌快值餘春閏涉江裙屐臨閉閣壺觴進聽
殘豐溜激坐剪孤檠燼曰余擁節旄百事惟任運曠懷

牙氏續言金卷六
三
託莊騷虛聲薄廚俊客談天都奇恍已凌千仞心折五
字篇直斫康樂陣味憐陷蔗佳興同舞鶴振宿霧林際
收纖月籬根印屢看頭觸屏那顧山童愠星芒眈酒鱗
叩首河漢近墨探豹囊祕硯拭鴛眼暈聊罄良夜歡待
發遠遊軻高風挹彩鸞遺軒訪寫韻

送劉山蔚歸里四首

子舍君頻夢歸期敢重違山將五老別潮挾片颿飛野
岸攀芳草長河訪舊磯天涯明月在相對共依依

昨歲滄江上煩君草捷書幽探偕亂後白戰愜公餘山蔚

曾倣歐公作
白戰體詩

金石畱音徧河梁結恨初南州今日榻猶接

故人裾

染翰從花外銜杯每夜分空亭看鶴乳曲牖挹蘭薰俯
仰成陳迹湖山隔暮雲祇餘雙孔雀聯句未同君

掉頭君竟去閉閣我仍畱老愧施行馬心搖逐泛舟樂
箴情不淺山蔚以樂箴見贈初服願終酬怡悵西園讌明朝欠老

劉

題柳愚谷畫寄北蘭澹公

愚谷秋容寫北蘭茅亭疎樹訝高寒衙齋不合長畱此
送與山僧壁上看

題愚谷畫五首選四

舊時名畫說丹臺丘壑何妨又別開地下王蒙應一笑

後生咄咄逼人來次韻 叔明有丹臺春曉圖

煙艇戛溪來竹閣綠雲上佳句憶蘇州天秋百泉響

藤纏老樹敲雲斂孤峰峙羨殺結茅僧泉聲鎮盈耳

黃王遺法此偏優不與金陵八子儔彷彿輞川詩意在

鶴巢松樹葦門幽

附次韻一首

至

虛閣傍山坳漁舫迎流上松聲與泉聲共作秋聲響

臘月十七夜衙齋小集同柳愚谷用陳子文豐臺

看花韻二首

捎簷梅萼雪爭新鎖印俄驚又一巡終歲艱虞持節地

幾時端的罷官人隔江雲岫遙相媚攬鏡霜髭漸欲勻

何物好醫詩思澀麻姑名酒貫來頻時買得麻姑酒

薺菜登盤逼早春青熒燈火酒千巡分題每愛詩中畫

入座偏宜世外人南浦疎鐘催短景西陂孤櫂待閒身

清輝恰送江天月頓洗胸中十斛塵

盆梅

素盞疎枝嶺外傳幽香歲晚挹來偏貯從官閣風簾下

韻奪山橋野店前映雪清寒渾欲笑張燈的樂倍增妍

故園回首無消息每到花時幾悵然

偶得黃魯直游青原山寺詩石刻後有施愚山跋

同愚谷次韻

雪霽天宇肅南榮絕纖埃俯摘菜甲嫩仰睇斗柄迴適
得涪翁碑遠自青原隈冲襟有深契懸玩耳目開太史
玉局亞曠代稱瓌材遷謫被黨禍所遇良足哀結伴游
寶坊振筆題荒崖高風畱至今攀附無梯階遺碑嵌堊
壁千年覆華榱好事宛陵叟慙慙滌塵埋磨墨搨萬本
汎覽遍九垓嗚呼此詞翰下士恆嫌猜繫余晚篤嗜披
尋到根荄寒夜集勝友法鑿傾深杯官樣脫已盡狂叫
忘形骸緬當揮灑時氣將礪壑摧宜與顏平原名山相

追陪

寺有魯公碑

我輩今且樂鼓角消喧歷發揚西江派眼底

驅淫哇須知元和腳翻與鍾張偕卷持入宦橐西陂歸
去來對作駱駝坐吟同轆轤催漏殘缺月上庭鶴雙徘徊

附喜得山谷游青原山寺詩石刻及柳愚谷做子

久畫幅因作長句

至

叫晴喜鵲聲楂楂春筍搖牕清香賒午睡乍起扶牀
坐折腳鐺沸活水茶數紙忽來涪翁蹟字如拳大行
疎斜蘇米猶嫌肉勝骨平原筋力何爭差還有石城
柳墳筆一峰老手無須誇疑我西村放鴨景孤篷短

擢畱溪沙人生清翫本無價賞心如癢逢搔爬門外
家僮爭傳笑嗜古真箇同阿爺

錢塘顧啟姬鄂子幼輿室人也曩於京師有花憐
昨夜雨茶憶故山泉之句一時豔稱之茲幼輿
遠道見訪口占以贈

花憐昨夜雨茶憶故山泉似此驚人句難爲贈婦篇畫
眉君暫輟下榻我相延賦就滕王閣靈風促轉船

賦贈憩雲菴心壁上人用虞道園題旦景初僉司

畫韻

東湖之東蘇浦南荒岡古柳垂毵毵把茅蓋頭來衲子

晨夕甕牖得勝探西山對面作屏幃江城不隔浮空嵐

澹臺墓近梵度隴百花洲迴鐘搖潭昨者雪片如掌落

曾一過訪駐兩驂化鹿拂子畱八席木陳大師別號化鹿
山長上人其法嗣也石溪

畫本藏勝絨石溪金陵
高僧善畫幸未凍死聳肩坐詩懷禪理相交

參繞籬且種幾行菜庇車那羨千章楠我官烜赫居以

冷邂逅法侶知無慚生平眠食願學道況復衰病百不

堪好聽粥鼓伴彌勒何須海岸方投簪

歲暮放歌用元遺山游黃華山韻示諸友

小兒燈下笑挽鬢阿爺真箇成衰翁曉對厭原起歎息

芒屨那躡青芙蓉此閒發願信天耳虛無因應余何功

竭來 詔蠲租之半冰雪已過開春容簿領朱墨紛且

卻逼除庭戶披和風年年鎖印一酬倡還以酒澆磊隗

胸愚谷金陵柳子雖老熊豹姿衆賓意氣凌長虹錢塘少君謂顧

傳賦草疇昔驚倒新城公謂王阮亭宮詹嗚呼終歲困轅下高談

今竝焦遂雄食單頗訝備方物龍豬龍南產遼菌放箸空自

顧一飽亦良易西陂魚麥況未窮搔頭忽憶篋中句次

第杏子櫻桃紅元次山選同時人詩為篋中集高念東先生有作云故園小圃又東風杏子櫻桃次第紅明日春明門外路清明消遣馬

中蹄

早春燕射六首選四

首春校射灌嬰城肅肅官僚待倚旌不比當年宴滕閣

僅將詞賦博虛聲

彘肩生啗酒淋漓彷彿趨庭薊北時旂常功業慚家學

祇肖先公兩鬢絲

又見東風入豫章衰遲無補起徬徨甘泉倘更從游獵

難挽雕弓射兩狼

斜景天開落酒卮簷花逕柳弄芳姿吟鞭擬向郊垌指

試手先成燕射詩

秋日夢葉荃伯內兄以菊花卷索題醒而作歌奉

寄

涼秋一別十載餘每逢秋日嗟離居今年聞鴈向江國

夢君不與平生殊手持畫卷索題句迫促但願急就書
鵝溪乍展豔秋色黃華翠葉何蕭疎振筆一笑殘夢破
窺人片月當牕虛句不能記意則省餐英歲晏幽懷攄
聞君目盲類張籍行階恆用柳栗扶顧我朝衫苦未脫
眼有黑花霜生鬢幾時親戚共情話閒閒十畝真歸與
君盲雄談尚驚座我老吟興吞江湖東籬斗酒足娛樂
還堪寫作二老圖天涯此際漫矯首宮亭雲樹愁模糊
題詩寄君待回鴈寸心飄比風中旗

秋日重過北蘭寺六首

簿書煙海坐相仍秋日羈愁一倍增何處空林堪脫帽

祇應還訪北蘭僧

竹逕茅堂碧蘚滋芭蕉葉大蔭方池到來空綠生衣袂
恰好詩翁著句時

荒阜孤亭緩步躋棟花坪好故人題香篝茗椀纔料平聲

理苦被蟬聲攢日西棟花坪爲邵子湘題

煙江疊嶂曾看畫列岫亭邊畫意賒奇絕廬山飛鳥外

一痕晴碧落簷牙宋王晉卿有煙江疊嶂圖

澹雪泉開碧篠籠酌來真與錫山同太平寺裏誇牛乳

僖父應知是杜公泉舊名俗甚亦子湘做參寥泉例以澹雪名之

偃仰禪關愜素心黃昏待月向風林騶人莫漫催歸騎

且聽莎鷄自在吟

附雨後坐列岫亭與澹公茶話

至

爲訪湯師到北蘭空亭晚坐倚欄干誰將六幅南宮
畫展向江天待我看

雲傍山頭看漠漠山從雲裏認層層雲山是一還非
一若箇能參最上乘

鎖闥卽事二首

豫章鎖院傍東湖試日秋高氣象殊蕉葉風微江籟靜
賓花雨過月明孤縱橫文陣來天馬遠近華燈散夜烏
獻賦幾迴思輦下少年餘興未全無

羣賢將事盡從容簾靜堂虛氣愈恭使者定推冰作鑑
老夫先識劍爲龍煙雲匡嶽開生面文字廬陵有正宗
畫角無聲公讌罷庾樓清嘯荅霜鐘

題唐解元墨杏花

瞥見緇塵改豔粧臙脂何必點窺牆依稀穀雨長洲苑

疋袖風流鬪女郎

唐題句云穀雨長洲苑旗亭賣
酒家女郎全疋袖杏子一林花

宋氏綿津詩鈔卷六終

宋氏綿津詩鈔卷七

宋氏綿津詩鈔卷七

歲暮對雪用王元之除夜寄羅評事韻二首

何處厭原山江城一皓然
殘蕉當徑矗孤鶴背風眠
蕭撼公餘地崢嶸歲暮天
欲將新熟酒分給釣魚船
幾日即朝正寒威凜劍稜
雲深南浦驛煙斷北蘭僧社
鼓喧江舫官梅簇畫燈長
歌容鍵戶雙戟結輕冰

竹屏

竹屏樸以華韜而畫堂遮玉版
淚痕結金絲蟬翅加青
蒼仍篠蕩縹緲帶煙霞
何必神臺上琉璃始足誇

附前題

至

屏風不蔽風九疊望玲瓏金綫縈湘水冰紈剪月宮
捲簾通積素秉燭映深紅身到琉璃界方知色相空
聯句後戲成一絕示兒

解道能文是虎兒天涯歲暮共深卮三年宦況惟今樂
雪夜聯吟孔雀詩

附步前韻

至

投老心情喜譽兒聯吟又把歲寒卮極知學語多生
澀不類斜川集裏詩

題沈石田所作米不米黃不黃小畫

米不米黃不黃淋漓水墨餘清蒼觀此石田題畫句便

知其畫神妙不可當昔爲王子石谷所寶惜後爲歸叟
希之所祕藏今也等閒落吾手不啻稚子得珍果連噉
不輟出入懷袖神飛揚竭來挂之高齋之素壁橫峰側
嶺斷雲疎樹一一生動發奇光漁舟儼瓢小萬頃凌渺
茫舉似宋代晉卿煙江疊嶂卷各自光燄萬丈不減李
白杜甫之文章精神所注足不朽卽此偶然片紙豈比
尋常粉墨雲煙過眼旋消亡嗚呼畫之妙也如此安得
驚人句題向畫之傍坐臥其下者三日推敲不定空徬
徨今日雪中大醉忽然振筆直寫所欲吐滔滔如決江
河之隄防世閒萬事非強致投筆一笑且甃瓶內凍梅

香

鱸魚

食指連朝動幾回銀鱗分自泖湖隈遠同黃雀馳孤擢
急倒清樽醉四顛風物尊羹堪顧惜煙波筍笠重徘徊
一官不直由來是抹煞張翰亦辯哉

放翁有千載虛名笑張翰一官元不直尊鱸句

附前題次韻

至

恰好江城淑景回壺觴款坐小牕隈春廚佳味來三
泖暮雨清燈辨四顛舉網眉山增想像驚秋張翰重
徘徊蓴冰滑滑堪同鱸鼓棹煙波亦快哉

得梁曰緝侍御報書卻寄

鄆陵先生梁曰緝風格崧高竝崑崙年未五十解組歸
勇退誰能似此急菴結老學不窺園剝啄何人許闌入
昔余需次金明門冷炙殘杯每霑及君方嶽嶽冠惠文
邸舍一尊將我揖晨夕廚俊快追陪堯峰之叟手頻執
謂汪純翁貴游車馬不暫停我輩閉關類蟲蟄有時雄談到五
更僮觸屏風蜚語澀別來忽忽三十年舊雨相思祇於
邑前一寄書恐莫達千里報章如取給中間引喻詎敢
承人物王東臯湯潛菴邈階級計日笑謝碧油幢同向煙波
著蓑笠講解孝經君語謙來書引放翁欲為鄉鄰講孝經句鑽研知遍經史
集曰余雖老願執鞭遙望陶城幾竚立

歲暮喜周岷公過訪即畱小飲次日同至北蘭寺
看雪次見贈原韻二首

天寒山稜削歲晏江流清蕭辰坐膝閣懷抱何崢嶸故
人千里來颿與孤鶩爭相見嗟我老君顏仍玉英讀君
贈我句如露霑金莖拂拭漫堂榻傾杯話平生梅花爛
然開無限冰雪情

朔風吹倒人江徼忽凜冽相攜策馬去飽看北蘭雪竹
屋壓欲摧池冰迴澗澗歌雜詼嘲頓慰七載別高文
晚愈妙堪追韓杜傑品泉滌俗韻論研得怡悅禪語叩
叅寥君優我維劣

林檎

嘉果名元著芳鮮出上林蘋婆同似玉霜橘愧稱金擘
自憐珍味收應奪衆禽濟南開館處遺帖大王欽

邢子愿有來禽館

早春新霽有感用梅宛陵和景彝閏臘省宿韻

循牆幾載抱凌兢隨手年光又解冰綠竹風聲傳細細
碧天雲葉卷層層閒從簾外移花盞鬧說街頭賣紙燈
禪榻鬢絲何限意誰云不是入山僧

雪夜飲酒二首

我官一何熱我心一何冷

同邑沈文端相國家書中語

卓哉前輩言其味

佳且永自我來江國頗厭煩囂境衙齋類僧居冷味快
獨領三載冰雪窟今歲雪更猛入春遍霑灑西山玉作
屏梅花凍不開何處覓紅杏寂寥燒燈前文案恰稍省
繙書駱駝坐爐篆兼燈影相伴鶴與鷗羽毛殊修整詼
嘲誦歐詩風騷羨馳騁

我素不飲酒飲祇一蕉葉嚴冬因臂痛遂與尊罍接一
杯霜枯腸芒角不可攝兩杯磊隗消起舞亦何捷三杯
變朱顏春色入雙頰譬彼枵腹子文史聊涉獵不輟日
勦旃聲名頓超躐深夜更傾倒霜笛小童撼大雪漫天
來屋隙飄蝴蝶吟情邈空山不復知浴牒呼兒寫硬句

凍硯急磨歛

喜得彭無山黃門報書

彭侯磊落襟懷孤歐陽四門堪爲徒孝廉鄉舉自蚤歲
英名直與烏石俱昔當閩亂託疾臥三年身上無完膚
時平筮仕得洵水跼躅何異轅下駒勸農講學比家事
按治豪右矜無辜時余持節向通潞薦揚會上大府書
強項之號舉以贈開心寫意欣相於我官于南灑淚別
轉燭不覺五載餘西江建牙愧濫寄臨事迂拙手口瘡
十三郡人少休息旦晚自劾歸田廬聞君畿東久閱歷
薑桂爲性終如初議鐫議罷考功法賜金乃復停鑿

輿盤錯屢試望愈峻大臣推轂 帝曰俞黃門給事荷
寵命聲價不啻璠與璵臨風短札聊寄訊雜以規諷伸
區區不圖作荅二千字委曲盡將肝膈舒嘉猷誓矢告
我 后焚草敢將虛名沾紙尾數語頗瑣細添丁笑作
三河呼似此交情足千古方之金石良非殊回環莊誦
口流沫中夜起舞傾杯壺再拜擬作王褒頌抃揚鳳鳥
鳴高梧

寄黃黎洲徵君

文獻南雷尚未湮望從卻聘愈嶙峋忠端氣節傳先世
顧及交游號黨人大業名山驚乍拜暮年撰杖擬相親

中原應社侯羸倡已自垂髻向往頻

應社倡自朝宗
所以應復社也

椰子

異果分來自嶺南棕皮剝盡殼中含白膚盈寸驚初剖
清液霑脣得半酣葉少林高傳載籍品奇味別帶煙嵐
非同蒟子徒爲醬畱作詩瓢挂草菴

燈夕用韓持國韻

雪晴豐霽驚閒牕詩懷似海筆似杠聯句兀昇倣韓孟
角勝不待金鼓縱向夕治具酬令節草草何必烹羊腔
畫屏匝巾妙剪刻空堂照耀開明釭琉璃挂定灑秋水
當檐祇恐風擊撞自我蒞此忽三載守拙頗宜民俗龐

有時策馬出北郭褰衣列岫亭名臨長江今也清興復不
淺嘯歌那許南樓降喧闐街鼓雜爆竹旗門深閉森矛
鏃起踏明月偕賓從踟躕鶴舞當階雙轟飲無算到酒
腳呼童仍進大食缸

春日雨中用至韻

溟濛江上雨正是插秧時種樹催辛秀聯吟擬退之濤
應翻古井柳欲暗叢祠惆悵遨頭阻空餘弄酒卮

附原韻

至

細雨連朝暮輕寒燕到時看山空有約蠟屐竟何之
水漲蓼洲渡花飛梅尉祠郊垆無限好未許醉春卮

雨

去冬十日雪今春十日雨端居豐暇豫冲襟快容與霑
灑徧江界淒清逼解宇懸麻急陣催驚湍空階聚雲濃
儼潑墨雷殷過撾鼓秧針戰遠騰浪花翻別浦巖崖遲
芳眺花藥探深隲翠憐棕扇敲紅訝櫻脣嫵照水聳海
鶴望晴叫鸚鵡巡檐腰髀便閉閣尊壘舉畫展江南春
思入古竹圃燒筍願莫酬束帶情何苦且好讀漢書因
之教兒炬

偶讀江湖長翁詩有西江米粳絲作窩之句適午
飯有此欣然爲長句用原韻

天陰對畫向霜壁嗒然移情忘
午食西江米釀絲作窩
妙句偶檢長翁冊
竭來廚孃適進此風味殊佳
驚創得我家西陂十頃麥
芄芄每愛沒牛膝餅盤麩
碟飽農夫至老不見長腰粒
況此粉之復縷之鹽緒
遜工玉遜德芼以薑橙點
醯醬放箸縈迴定千尺飯罷
江樓望江甸如毯新秧風策策

雨中示朱樸士時樸士將遊齊州

旗靜門閒戟自交
雨中飢鶴上堂坳
花枝檻列春秋桂
山礬一名春桂
菜把園供大小巢
雙屐輕拋苔欲澗
三杯軟飽句從敲
暢遊擬共修之去
免使山靈遠獻嘲

采芑作用陳簡齋村西買山藥韻

曉起向射廳偶試登山脚
鶴邊送遙青紛披足花藥
芑從故鄉移生意恐小卻
孰知春風吹新苗映叢薄
采采念雅詩清露衣上落
我今困塵鞅如鳥雙翅縛
野飯偕村農幾時踐夙約
芳歲委江濤搔頭聽姑惡

起姪出守威寧將取道豫章詩以遲之
三首

蠻煙瘴雨自遐陬
年少何妨萬里遊
此去當官須鄭重
道傍負弩是諸侯

過家上冢清明後
取道西江慰老懷
風雨連旬縱畱滯
也應擁傳度臨淮

矯首江天耿寸心月明還惱蔽層陰
鮒魚將到紅薔發
遲爾衙齋次第吟

咏庭前花木五首

誰傍疎籬種小桃亂藤惡竹苦相交
年來手爲芟除卻
牆角棕櫚得竝高

架上紅薔錦段張惱人顏色帶人香
簿書叢裏抽身去
獨凭欄干到夕陽

叢桂連蜷色可餐凌晨清露更溥溥
白頭翁亦知憐此
故把新巢葉底安

西江昨歲兼旬雪末利芳蘭晚吐芽
一事最爲殺風景

佛桑兩樹不開花

山櫻矯作盆中景輪囷離奇亦可觀
不道如珠纔數子
朝來已被鳥銜殘

別院二首

別院如山靜旗門鼓不撾往來行藥地
開徧蜀葵花
搗醬收梅子移欄避筍芽也知公事少
清課近來加

朱悔人雨中見過畱飲衙齋同吳志
上兒至分賦

用湯西崖簡張弘蘧韻

潞沙一別五年強猶未抽身返芟梁
何意宦途容建節
無多家法祇循牆故人偶過同聽雨
好句分題各據牀

端酒依倚漉酒冽醉餘消受竹風涼

端酒出金陵味類豐潤漉酒

附前題次韻

至

追歡直到五更强可似懷人賦屋梁鼓棹江湖期作

伴

志上訂西湖之遊

吟詩唐宋戒騎牆黃梅雨急移茶竈綠竹

風清理筆牀故態而今都不改恍疑蕭寺納新涼

昔同

悔人寓都下聖安寺

再疊前韻寄周杞公

來往京華十載强知君今已厭津梁何期榻下南州

日恰好花開使院牆四韻詩成驚鶴夢三更月上浸

書牀遙憐泛宅周元道獨傍篷牕趁夜涼

辛未夏五月過北蘭寺時煙江疊嶂堂初成漫賦

五首

茅堂一到一番幽碧筍如簪傍檻抽得得山僧扶杖出

楮袍窮笠總風流

棟花坪子最荒涼徑轉籬開石几張好處花時還記取

繽紛紫雪點衣裳

小閣秋屏竹樹團蕭森五月欲生寒推牕又改山川面

不與空亭一例看

煙江疊嶂堂中坐流覽煙江疊嶂圖莫把清光浪摹寫

且須長句誦髯蘇

斷雨殘雲止復行蒲颿十幅往來輕斜陽忽放山根出
江外重湖一綫明

附前題次韻

至

北蘭曲逕入清幽蕉葉藤梢次第抽行到空亭一翹
首稻花雨足漲江流

波光激灩柳陰涼白板爲牀小閣張長日聽鷓同老
衲浮嵐暖翠撲衣裳

棟影蕭疎竹影團山泉一酌訝清寒毗陵題後人爭

品未許參寥兩樣看

澹雪泉爲邵子相題

眼底江山真是畫堂中水石有新圖

羅飯牛畫壁

分題爭羨

髯翁句風調居然似大蘇

謂梅人

蹋徧平沙未肯行心隨鷗鷺泛波輕蕭閑更愛江天
寺一尺斜陽塔頂明

題祝京兆髮書二首

迸出驪珠濡墨時縱橫真欲逼游絲香鬟髮鬢盤鴉色
剪付枝山也不辭

小蘸烏雲向研池中書君老未應奇宣和飛白看雲字

爲余家舊藏

三昧均將造化師

雨中用至韻

近得西陂信荒寒比舊加空亭浮積水茅屋映疎麻鄉

國愁何劇江城晚不譁射堂閒對酒冒雨摘新瓜

附原韻

至

鎮日鉤簾坐羈愁一倍加雷聲猶殷壁雨勢似懸麻
竹閣樽初倒旗門鼓不譁何時扶杖去齊已共茶瓜

謂澹公

次韻荅朱悔人四首選三

堆案文書撥不開敢言胸次絕纖埃事當鑿枘新愁結
詩別源流舊雨來江上鮒魚纔出網幕閒乳燕乍翻雷

臨觴古跡無勞問已妥先賢闢草萊

新建理學
忠節二祠

河曲句畱憶潞沙鈴齋會合興還賒經旬眠食都添味

何處林巒不是家古寺扶筇行竹色方塘展席對蘋花
匡廬傲我曾遊眺指點空亭帽影斜

跋燭分題共策勳深衷湖海託鷗羣家人雜沓求書扇
裨將追隨解好文小別西江浮篋舫言歸東浦臥溪雲
祇應歲晚寒梅發明月幽牕好遲君

附送悔人歸潛江

至

我家曰西陂君家曰東浦各以水爲鄉煙波殊容與
東浦魚可罾西陂藕堪取白芡及烏菱一一滿洲渚
頻年各驅馳茅屋未獲補舊業漸荒涼夢魂寄鄉土
君今買扁舟遠下宮亭澣計日到家園尊酒狎釣侶

我獨留南州歸期猶多阻
向夕出送君淚落渾如雨
執手不忍離江干月已午

漫興六首

稀疎梅子墮階黃
雨過棕櫚葉有光
末利蘭花相鬪發
高齋長日罷焚香

吳下楊梅未結綠
嶺南荔子倩誰傳
眼前一事差強意
頓頓鮭魚六十天

盆內荷花靜且妍
愛他新葉更田田
幽牕夢醒聞疎雨
只欠西陂打鴨船

曲徑斜陽豔草花
幾枝紅蓼奪明霞
蜂房偶過堪成笑

我放衙時爾報衙

連日北蘭閒看竹
全拋俗韻得相羊
依稀東圃筓籬下
二十年前一段香

庭敞簷虛對遠天
桃笙烏几晚風前
小兒下學來相揖
左氏喃喃誦一篇

送羅飯牛入廬山歌

子以牧爲名我以牧爲字
二牧生平偶不同
各於詩畫有深寄
我詩苦吟四十年
得小三昧嗟華顛
子亦行年平七十一
生供養惟雲煙
昨於北蘭寺中煙
江疊嶂堂見子所作煙江疊嶂畫
壁纔數尺意興何瀟灑
一掩

一重出肺腑，約略茅亭總。光怪猶云此，水石規摹董。巨而爲之，更有粉本迴出董。巨外匡廬五老，崢嶸霄漢皆吾師。子攜畫筆往我寫詩篇，送如澠之酒，壯子行何惜。傾倒畢，卓甕酒酣，一棹浮章江。恰值梅雨初晴，山鳥哢

附前題

至

羅叟七十頂未禿，欲向匡廬結茅屋。我昔曾望匡廬峰，峰峰拔地如芙蓉。我昨又讀匡廬志，大小三百六十寺，安得數幅鵝溪絹。煩君到處圖所見，歸來貽我挂西堂。一日匡廬遊一徧。

浯溪磨崖碑

驪珠顆顆照荒厓，元頌顏書一色佳。大業當時勞紀述，後人持論苦擠排。秦碑周鼓寧須詫，雨點苔花詎可埋。墨本看來頻下拜，浯溪還擬蹋青鞵。

附前題

至

天寶末季嗟披猖，祿兒騁兵來漁陽。至尊青騾西幸蜀，百僚奔竄何蒼黃。撫軍誓師有太子，英雄李郭同時起。恢復兩京掃妖氛，中興事業真堪紀。維時紀功者爲誰，魯公之筆水部詞。詞則嚴正筆則健，秦碑周鼓猗那詩。緬想磨崖高勒此，忠義凜凜動湘水。恨不盡挽湘江流，一洗唐家九廟恥。

以方竹杖贈悔人作短歌

寧州方竹亦一奇截以爲杖良所宜四稜獨異碧篠蕩
七尺誰琢黃琉璃杖兮我爲朱髯餉相扶直到廬山上
勸君慎勿規而圓本色一改不值錢

附前題

至

分寧方竹方如削截爲拄杖堪倚託平頭七尺總觚
稜其中扣之復寂若世人愛圓不愛方扶出只恐無
地著青鞵布襪正相宜明日好試登山腳

北蘭僧房半閒余題詩處也悔人倣曹峨眉司成
爲王阮亭司馬題漁洋詩屋例署爲綿津詩屋

繫以斷句余愧不敢承漫爲賦荅

綿津三舍避漁洋詩屋新題詎敢當祇好罷官詩也戒
蒲團分據已公房

白槿

舜華自昔豔新粧皎皎風姿獨擅場一樹籠煙閒倚檻
幾枝如雪澹窺牆唐昌品格從教異蒼荀霏微祇遜香
習靜朝來相對處分明姑射共徜徉

奉懷徐昭法先生時得先生畫芝蘭圖

吳閩幽絕是華山高士何年此閉關造訪旌麾空悵望
湯潛菴曾過訪不遇
逃名巖穴愈孱顏月泉吟處仍霞外海嶽圖成

落世閒乍喜芝蘭一披拂清風千里欲追攀

偶讀松圓詩集題卷末

風流詩老說松圓妓席歌場句每傳斟酌四聲成白髮

低徊三歎是朱絃長蘅李流芳比玉宋珏題襟數楚水吳山寄

興偏蒙叟錢虞山於今亦黃土阿誰真賞浪淘編

題李長蘅蒼巖古木二首

蒼巖古木寫蕭疎名士風流託興餘題字幾行心折甚

知音誰似董尚書文敏

紙上煙嵐若可餐董源老筆共噴吼怪他丘壑如相識

在昔忘歸贛州巖名得飽看

數月來聞汪鈍翁王勤中惲正叔劉山蔚相繼謝

世灑淚賦此

遠道頻傳薤露歌人琴此日奈愁何宋中耆舊傷心盡

吳下風流逝水多塵篋祇憐餘翰墨荒墳欲拜阻關河

黃昏鈴閣題詩處忍見空梁夜月過

漫嗟再用西厓韻

漫嗟霜鬢入秋強且聽童兒誦穀梁無賴戎葵紛上砌

斬新斑竹欲過牆鷗情鶴思天涯客筆格茶鐺露下牀

缺月漸升江介白一聲畫角助蒼涼

贈羅飯牛

老去飯牛子圖成破墨山襟期自丘壑揮灑到荆關寄
迹蓼洲上時遊廬阜閒煙波相對處羨爾似鷗閒

喜錢介維見過

秋日秋屏接鹿牕

介維別號

鬢眉也作鹿門龐江湖又得冲襟

合歲月真驚過鳥雙壁出豹囊聲瑟瑟

時以藏墨見貽

尊開樺燭

影幢幢看山尋寺中丞事

王文成有中丞不解了公事到處看山復尋寺句

從此題詩

獨爾降

秋日示介維四首選三

莫漫江頭問檝師天涯會合且題詩北蘭修竹東湖月
恰好新涼欲到時

扁舟羨爾全無繫倦鳥嗟予尚未還不少雙江風味在
兩翁相對聳吟肩

天都峰勢迴孱顏摹寫輸君倚杖閒今夜老夫有清夢
暫拋廬阜向黃山

送介維還歛兼寄靳熊封

楓葉飄蕭動夕吹送君南浦意淒其小畱黃篋鷗邊舫
共吸清光月下卮求研那辭開古井

相傳歛研出獄中古井者佳

搗煙須

爲寄西陂

託介維製西陂墨

鴈堂令尹如相問報道殘年祇辦詩

附送介維

至

故人理歸檝秋色老芙蓉此日一尊酒何時尺素書

江楓銜落照海鴈下荒渠我亦羈棲客能無憶舊廬
早秋雜興五首

豫章兵火苦侵尋何限 朝廷眷顧心三載蠲租三十
萬江流難竝 湛恩深

武陽陶瓦教當時碑版煌煌紀牧之報稱愧臣無一可
也從天上荷 殊知

劉楨禦變有遺篇此事當初亦偶然敢倣文成磨石壁
大書深刻向開先

讀法仙宮月吉趨先賢祠宇闢東湖千牛習氣都驅遣
甘作乾坤一腐儒

北蘭寺裏看山罷種菜亭邊校射歸一事夜來徵左氏
青熒燈火坐書幃

夢中得句醒而足成之

戶外青山扶杖得隴頭明月咤牛還夢中何須此景親消
受夢裏題詩亦灑然

奉酬阮亭司馬見懷之作次原韻

清詩遠道寄南州正值天涯獨倚樓 聖代史才借司
馬老夫心事付閒鷗雲煙鎮日分洪井魚麥何年慰白
頭欲荅鐘鏞慚瓦缶坐看孤月下江洲

又奉荅題煙江疊嶂堂絕句二首次原韻

茅堂樹色隱重湖堪入營丘水墨圖編籬開逕年來事
卻恨漁洋志裏無司馬數年前使

句畱初地對江湖功業韓襄毅公林貞肅公敢浪圖詩罷老僧同

啜茗風流龍井未全無

題松圓詩老寒林曳杖圖

孤岫聳天外寒林參路傍松圓寫平遠老筆追河陽縣
我漫堂壁當暑生風霜踽踽曳杖叟定向華子岡

空庭

空庭明月共徘徊偶試玻璃海外杯石谷新圖阮亭句
恰從京國一時來

雨中同心壁上人集煙江疊嶂堂

雨過江干寺尊開樹下牕花香齊已共詩格阮亭降時

阮亭司馬見贈詩斜照山全出浴波鳥自雙清光費摹寫回首暮

鐘撞

羅浮仙蜨歌寄至兒

有客贈我羅浮繭狀如榭繭大二三甕形雖非扶桑敵

土色良與赤埴參筠筴遠致自海嶠依稀尚帶青羊嵐

南榮高縣清明候兒童周視恆耿耿恐遭陰翳傷獨蛹

默加愛護祈先蠶昨者蠕蠕忽蠢動化生彷彿縑箱蟬

輪困翅展摺疊扇五色渲染畫史慙勻圓四點儼雲母

奇光異彩紛相涵文身祇宜花底活纖眉卻令閨中耽
紅薔正吐摘蕊飢移置美蔭選石楠三日戢翼蟬抱葉
栩栩倏爾薄蔚藍恨不維繫作佳玩祕篋聊記資清譚
今夜月明晃流汞空庭佇立當微酣一蜚翩然拂檻落
絳霞幾縷從天南殊常綺麗奪人目風前略辨眉麤麤
或云其母來覓子藥畦苔徑恣幽探漆園偶夢情不極
滕閣欲搨誰能諳俄驚霄漢去無蹟神仙窟宅隨鸞驂
葛洪遺衣迴茫昧此理揣測余何堪夜闌高咏誠一快
千里屬和催中男

鄭谷口寄隸書韓詩喜而賦此

雲陽遺法邈難窺谷口農今擅此奇寄自臨池呼酒後
快同駐馬看碑時縱橫似出華山格排冪宜書韓愈詩
舞女插花人始愛那從老櫟覓鍾期

谷口與周元亮先生最善

壬申四月十九夜夢阮亭司馬屬咏瀟湘鴈醒而

急錄之一字不遺

岸闊水無際月明春鴈翔徘徊念儔侶清影落瀟湘

暇日治圃志上以詩美之次韻奉酬

荷鍤腰鎌命老奴射堂種菜學髯蘇初心祇許親藜莧
勝事還教理竹梧雨後青蔥人罷灌畦邊吟嘯杖堪扶
多情上客來佳句石谷他年待補圖

玉茗花

雙樹連蜷傍檻斜園丁喚作白山茶種疑后土廟中得名自臨川堂畔嘉灌溉每同蒼筤惜陰森還借海榴遮春前看取開如雪細咏西江第一花

題倪高士幽磻寒松小幅次畫上原韻

松色與磻幽依稀寒溪路珍圖傳江南三日畱閉戶雲煙拂几席流覽慰遲暮寥寥此筆墨深合荆關度俗韻

吾庶免永言高士晤

江南人家以有無倪畫分雅俗

西城別墅詩為王清遠賦十二首選九

追錄丁卯年作

石帆亭

苦竹截為檻香茆縛作亭宛同一扁泛憶向雙江停不挂五兩去聊愛羣峰青

樵唱軒

返照轉樹腰微風坐來歇是時開南軒可以望明月我愛孟襄陽呼與掘詩窟

半偈閣

小閣不數級香鐙閣上俱亦有和松菴不去嗤我迂幾時持半偈來共叅文殊

大椿軒

鼠姑色太妍栗畱聲太滑獨有薜荔裳風髯自摩戛何

如漆園椿曾閱千春八

雙松書塢

粲粲列宿迴謾謾輕濤生秋陰落滿地鷄犬亦未驚但
聞深隴裏夜牕出書聲

小華子岡

柴門鎖松筠林麓何窈窕有時出西莊村火動林杪指
點華子岡比似輞川小

三峰

三峰出羣早磊落秀削成能使米顛拜我見亦乍驚下
有萬斛泉鳴玉長琮瑋

石丈

欽寄故有意離立長如人環以羣木古況乃蘚繞身誰
謂石無語亦貴氣象伸

竹徑

夾徑千琅玕新詩上頭刻彈琴不見人衣染青蒼色豈
知王逸少亦向竹中匿

廬山詩六首

有序

壬申七月余自江右移節三吳放舟彭蠡抵南
康初十日謁白鹿洞禮成遂過三峽橋遊棲賢
觀玉淵潭明日經萬杉至開先坐漱玉亭觀瀑

宋氏續言金卷一
布就宿寺中又明日登舟往返三日得古詩六
章同遊者南昌廣文楚材諸生涂居璉錢塘太
學吳允嘉釋宿應超淵寧都山人羅牧兒基筠
族孫鈞凡九人

自我來豫章便結匡廬想顧爲塵網羈不得掉頭往今
晨泊落星篷牕晴嵐盪巖厓擬攀躋懷抱輒蕭爽初途
背城闔肅然五老仰陂陀屢登陟耳畔清泉響小住傍
松根山疏時在掌鹿洞千年踪絃誦欣吾黨行行促輿
夫樂地兼幽賞

洞古之國學肇興自南唐考亭昔主此垂訓何周詳適

際堯舜世大化九域翔宸翰與賜書照燭畱山岡

繫余忝秉鉞咫尺恆相望學規藉文敬余曾頌胡文敬學規愧未親

敷揚移鎮荷新命來謁夫子堂諸生肅奔走特達成

圭璋勸勉亦云切廩餼聊薄將余置洞田少許象山講義利令人

泣霑裳大哉子朱子錄取置座旁斯人不可見後學徒

徬徨洞壑蘚花積橋亭松風長欲去仍頓軛願此抽篇

章

久曠山澤遊冲襟鬱以積出洞偕衲子展眺意良適溪
攢芋葉青籬綴豆花白村農遮道周兒童窺門隙酒漿
競跪進誰忍去爾迫俄驚三峽橋截礮臥千尺斷岸儼

瞿塘奔濤撼怪石亭午炎威熾橋下任投憤颺迴難久
畱更振厓畔策玉淵得一奇深潭注寒碧葉落鳥應救
中藏蛟龍宅林際開寶坊鐘魚震幽僻講堂倍寂寥緬
懷讀書客連蜷雙桂樹攀條足晨夕解帶鎮山門佳話
傳自昔我匪蘇楊儔一笑踵其迹楊文襄效坡公畱玉帶于焦山余復繼楊畱玉帶于此題
名倩山人顛米爲辟易須臾纖月明松杪翻宿翮呼酒
勞徒侶流螢點締綌

趁曉催遊伴竹輿嘔啞喧削壁望五乳隱隱辨寺門緣
壁出汲僧騰擲疑孤猿誰繼憨大師妙義闡風旛三歎
舍之去萬杉停短轅當逕排古礎驚並石鼓捫法界啟

北宋丈室殊弘軒昭陵御筆失潁濱長句存香飯分一

孟杉影清心魂僧誇槐京字導我過荒園

寺後有槐京包
帝書龍虎字

俗

書那足貴乃比璵與璠磴礪楓樹下嘯咏石上蹲野翁
筓籬外擁瞰頭如黿秋暑酷未退何時雨翻盆行將挹
飛瀑庶滌胸中煩

精藍首開先欲到心甚渴望見鶴鳴峰已覺俗韻割迨
至招隱橋一旦詩意豁千松夾道迎蚪龍鬪空闊茗華
放翠蓋可玩不可掇路轉殿閣雄欲並山截薛紆迴軒
檻幽經營元宗末浮慕世外遊忍將民財括轉瞬幾滄
桑書臺蒙野葛石眼聰明泉畱洗水精鉢煌煌紀功碑

聲施何弘達嘉靖識良異觀者恆咄咄

王文成刻石在正德庚辰明年世宗即位碑中

有嘉靖我邦國語觀者異之

涪翁七佛偈顏柳受鞭撻墨本舊已藏苔石

今一抹披尋榛莽中何處萬雷聒西偏浴礪脣引溜來
活活忽入青玉峽奇勝千山奪絕壁瀑花翻箭急雪色
潑潭曲神物蟠靜對戒嗔喝移情海岸同衣袂霑跳沫
孤亭坐忘歸朝衫此回脫

月落潭上回入寺月仍見始知玉峽高直遮天之半

香臺敞宜步禪室靜堪戀老桂當簷盤美蔭周一院雪

公雪嶠大師

遺額縣筆勢鍾張擅古秀奪華亭洵足光紺殿解

衣投繩牀聲送莎鷄亂叶炎官織未收經旬苦揮汗叶

異哉今夕涼不待秋風薦空山氣候殊卽次眠食便曉


起覓歸路不禁再三歎叶茲山燦往牒雲岫夙健羨三

日走山麓聊識匡君面何當謝圭組千峰探欲徧拾松

煮瀑水息我雙翮倦捨舟復登舟惆悵猿就檻叶回頭

眺黃巖飛淙挂匹練

宋氏綿津詩鈔卷七終



宋氏綿津詩鈔卷八

春日過靈巖元墓看梅同吳志上心壁道人兒至
六首

花事盛江南看宜蕊半含春風吹小艇遠岫送晴嵐野
店經行好精廬取次探提攜雙蠟屐謝客未應慚
千載吳宮蹟青山未陸沉廊空傳響屨臺聳罷調琴懷
抱江湖入登臨感慨深迢迢香逕在白鳥下波心
斜陽照山麓鼓柁向長河掩裏梅花放人家酒旆多溪
橋聊待月畫舫忽聞歌煙水迷濛際幽香幾陣過
小泊太湖尾高眠領衆香凌晨扶竹杖結伴入僧房仙

梵雲霄落 宸遊礪壑光相思今一寫倚檻對漁洋謂

阮亭
侍郎

未嚼銅坑蕊還看隧道花董壽
陽墓山瓢挹冰雪風袂冒槎柯

危石間堪凭遊人靜不譁誰將補之筆貌取此幽葩

最是吾家山千林一望閒淺深花遠近上下鳥綿蠻勝

友此為別時志上還錢塘
心壁還廬山官衙仍獨還呼兒編蒲草將句寫

孱顏

附前題

至

過雨梅花放春來得共探一江煙漠漠十里柳毵毵
胥口帆初挂橫塘路舊諳不須山寺近出郭接晴嵐

硯山高不極亭午訪禪林磬響雲煙外湖明竹樹深

美人長寂寞霸業總銷沉小立空臺望春風憶鼓琴

落日下船去微風蕩碧波帆飛疾於箭帶月泊山阿

漸覺梅花近時聞香氣過一尊村舍酒徒倚聽吳歌

太湖三萬頃遙望上漁梁一葉凌空闊千山接眇茫

松風喧急雨溪月冷鳴榔坐久回船臥梅花入夢香

晨興扶短策數里到山窪夾道竹千箇橫門梅半花

漁洋浮翠靄梵唄出煙霞搔首空廊坐吟深日欲斜

吾家山畔望林壑倍幽閒春雪忽為海香風又一灣

夕陽花綽約歸路鳥綿蠻不淺登臨興誰當共往還

送心壁道人還廬山次邵子湘韻二首

送爾半塘上飄然廬阜歸肩挑桃竹杖身挂水田衣詩
有江行作帆同燕子飛到時春欲盡開徧野薔薇
我昔開先寺曾為竟日遊看碑緣石磴覓句坐僧樓瀑
響晴疑雨山空夏亦秋卻因贈別處惆悵桂叢幽

題吳孟舉黃葉村莊圖二首

黃葉村莊結夢思披圖略約帶疎籬磻壑幽幽鎮相對

合教唱出菜花詩

孟舉有菜花詩

溪堂高話者誰子風味裴王差不殊我亦西陂有別業
幾時放鴨入菰蘆

後園六絕句

官事自勞如我懷何容與斜日後園中閒關聽鳥語

牡丹故園種髮鬢香鬟開

花名雕髮輕醉

傳呼吏人至共我看花來

阿段荷鍤來開畦花臺右老翁一飽餘小試種菜手

幾日春欲老空林新綠加乍驚殘雪在零落繡毬花

種藕向清池來看日幾而新葉小如錢呼童打花鴨

西軒八席幽砌上苔痕畱焚香此獨坐偶似韋蘇州

秋日池上遣興六絕句

天矯驚看龍挂湖漫天雨氣白模糊

龍挂湖白模糊吳中農諺也

桔槔費

盡千村力龜坼山田始一蘇
此日監門已繪圖忍教一雨便追呼比來柄鑿不稱意
獨遶清池數鴨雛

日過西軒始放衙厭聞鼉鼓戟門搨恤人悶悶渾無計
號作韋菴也不差韋蘇州傳有悶悶恤人語

荷花娟淨水平池疎柳空亭韻細颺坐久忽疑乘小艇
清香無際入西陂

每逢衲子喜追攀瓢笠何當遂我閒世外因緣知有在
北蘭書到又盤山近得澹雪拙菴二公書

肺病秋來劇可憐詩腸枯比旱時泉偶和故人池上句

坐殘清漏廢高眠子湘亦有池上詩

題王令貽垂竿小照二截句

幾株疎柳蘸清漪秋日柴門把釣時閑放釣竿君會不
溪山滿眼恰催詩

老去煙波憶釣家曾攜笻簪上漁舡披圖大有西陂景
只少黏天白藕花

曉發句曲望茅山

于役全將俗韻消曉風殘月望來遙淒清行潦侵山腳
明滅輕煙界樹腰飯進老農新獲稻詩尋野店舊題橋

余舊有經姊妹橋詩茅君咫尺無由覲空挹晴嵐向碧霄

惠山紀遊寄子湘

毗陵挂颿得快風
惠山迎人媚如許
老夫遊興忽勃發
藤杖芒屨勇可賈
初從曲港破澄碧
俄近招提聞粥鼓
入門鴨腳葉亂飛
颿颿晴空來急雨
蕭閒法界帶巖壑
抖擻冲襟絕塵土
肅瞻祠宇憩杉徑
華孝子祠爰探泉源歷礧
戶一泓古甃酌清泠
香美應知勝牛乳
竹爐遺製爭摩挲
掌爐為明初僧性海製
王孟端諸公圖咏鹿柴鄰園任容與
鄒園荒寒僻境難久畱
展眺東山趁亭午
丹房禪室半荆榛
獨有浮圖峙今古
九龍峰迴阻霄漢
五里湖明辨洲渚
微茫雲外是具區
聖姑毛公堪爾汝
下山餘興不可遏
別苑重過瘦筇拄

秦園

良讌屢到嘉樹堂
新構偏愛梅花隲
卽次思欲委符節
局促人閒亦何苦
還舟命酒寫所見
回首林巒幾延佇
屬和好待青門翁
定笑頽唐劍南語

題朱竹垞小長蘆圖卷遙和阮亭三首

誰寫水村圖
蘆汀秋色冷
詩翁脫帽來
懷抱江湖永
愛此雨蓑煙笠
相將更有佳兒
我亦何時攜幼
孥船直入西陂

斜陽裊裊釣絲風
蟹舍魚莊野岸通
此際披圖心一洗

解人卻憶米南宮

米有寶軸時
開心一洗句

寄題曹子清戶部棟亭三首

並序

子清之尊人於白門使院手植棟樹數株綠陰
紛披可愛因結亭其間顏曰棟亭子清追念手
澤屬諸名人賦之詩盈帙矣未幾子清復移節
白門十年中父子相繼持節一時士大夫傳爲
盛事題咏愈多予與子清雅相善也乃賦三截
句以附諸公之後云

燕山老桂蠹不青三槐堂前槐亦零惟有白門棟樹好
六朝山色一茅亭

婆娑老幹已成圍記得青青拱把時繞樹千迴清淚墮
棟亭可是峴山碑

棟亭好景白門稀棟亭新詩不敢揮只向誠齋乞一句

南風紫雪棟花飛

楊誠齋詩只怪南風吹
紫雪不知屋角棟花飛

題沈客子林屋山居圖

林屋知名第九天洞庭南望隔秋煙羨君獨占仙靈窟
采采琅花酌紫泉

尹山書酒閒舉杯向余曰僕明年五十矣請從高
達夫五十學詩余聞而壯之口占以贈

有唐高達夫五十而學詩茲事傳說久人每豔稱之余
友和靖裔皎皎冰雪姿雄談耳熱後霜髯當肩披今年
四十九願效達夫爲我聞君此語曠哉懷抱奇非同齷

齷子祇從流俗期朝吟花一朵暮吟酒一卮風騷供鞭
撻終以詩名垂始雖淪一尉旄節行可揮三吳山水窟
是處畱清暉卽目得詩本摹寫良所宜請君振高唱畢
願復奚疑

高江村詹事以乍浦秋鳥見貽兼索題句賦此答

鳥產海外似黃雀而大每冬風吹落乍浦屠康僖
墓木上土人以竹竿黏取味最美當湖方物也

吳越食品風味饒當筵往往羅珍錯歲晏齋廚有餽遺
園官菜把嫌澹泊江村先生真好事方物遠貽資大嚼
乍浦秋鳥信一奇瓷甌泥封驚創獲叶書言此鳥產海
外朔風吹向屠墳落黏竿巧取送飲流腹腴項鬣皆可

卻薦而後嘗美無度鬪箸小兒來霍霍欲證注疏失羽

毛但憐觜爪同鋒鏑輪困不數刺毛鷹亦吳中各產肥澤殊勝

披綿雀深杯屢倒慰老饕燈下盤空剩糟粕新詩昨始

賦了哥近同竹垞子湘賦秦吉了險句今還續鐵腳向於京邸有鐵腳聯句毋煩使者火

急催此際枯腸幾迴索叶

好雨知時節

快哉好雨知時節入春三日陰雲結初聞浙瀝動官閣
旋見飄蕭徧林樾氣象定復兆豐登到手應多十斛麥
去歲正當六七月江南苦旱田龜坼長江之北魚大上
補救無能愧迂拙黃紙尺一天上來發賑蠲租此邦活

三冬以來雪又無顧瞻南畝憂方切歛忽雨師戒號令
東郊優渥桑麻茁繫余駑馬皂櫪中也得一飽賢與麩
後園峭蒨竹樹幽當階浸漬莓苔滑巡檐索笑樂何如
縞袂佳人對高潔泥濘尚爾阻遨頭懷抱翛然已巖穴
臨風載咏少陵詩快哉好雨知時節

早春過支硎趙凡夫丙舍用婁子柔訪凡夫韻

出遊趁新霽嚶嚶山鳥音篋舫繫野岸籃輦緣荒岑石
門歷曲折花隴窮幽深徵士高蹈流遺構傳至今松風
激天際彷彿聞清吟僧徒設茗供自昔君所歆梅開小
宛居想見此盍簪展墓芳草積隕涕浮雲陰載過千尺

雪灑然清人心

春日過韓慕廬學士支硎別業不值二首

攜得一雙屐來尋半畝園春風開小逕啼鳥靜高軒跡
喜支公接花同鄧尉繁林閒畱茗具何客此清言

主人不相見斜日獨淹畱巢入雲煙結園有雲煙巢春迴礪壑

幽折花應惜手藉草任科頭何日城南會聯吟願許酬

贈太僕卿高公輓詩

高名天爵以建昌守殉難閩中

烏石峰高穴貔虎赤狐跳跟黃狨舞血牙鬻炙氣益麤
紅帕抹首錦纏股妖氛一夜連汀漳盱黎城邊波沸湯
太守弓刀夜棄障不識真卿作何狀七尺誓與孤城俱

變生肘腋誰周防去聲 嗚呼南八真男兒壯士隱忍欲有
為不成死耳肯作賊銜鬚茹刃甘如飴璽書褒忠 圭
恩厚汗青焯焯行不朽顏舌段笏今有無杏山鐵漢建
昌守

題澹雪道人小照次子湘韻

扁舟一道人超然古尊宿斜陽泊斷岸靈籟響喬木何
人貌得之胸映澄江淥白鶴招不來閑雲伴幽獨

題韓慕廬閣學松溪洗研圖

禹尚
基筆

蒼蚪拏煙上空碧千年古藤絡崩石清泉瀉珠跳的皪
誰歟松根坐禿幘儒林丈人文章伯小溪抱研弄潺湲

肩高於頂髻指天蠻溪石卵紫玉堅供以諸葛鼠鬚廷
珪煙何妨一揮百番玉版箋廣陵禹生真好手此畫此
人兩不朽我亦乞作西陂魚麥圖禹生禹生許我否

深淨軒落成用深淨字爲韻二首

有池鄰庖溜委棄歲月深屏除小結構開軒臨碧潯古
柳忽生色怪石增嶇欵種荷荷有花種竹竹成陰何意
咫尺閒渺然江湖心幸非池館華聊繼韋公吟

述鹿軒名稍荒僻來鶴樓名覽易竟惟有此軒中水石兩幽

映穿藻素鱗跳裊露紅糝靚勝友肯過從逍遙共觴咏
恍疑淥波村高臥謝朝請三復蓋公言庶幾得清淨

夏日池上為梅耦長孝廉題阮亭侍郎吟卷

池上幽幽得勝尋荷花窈窕竹陰森偶來深淨軒中坐
好把漁洋句子吟大海宵冥驚逝楫破牕風雨憶題襟

余嘗模元人破牕
風雨四字贈阮亭

和歌剩有都官裔並與勞人洗片心

夢女郎以畫蘭一朵索題口占二句醒戲成之

三湘一朵貌來幽綺閣深情未易訓堪笑鬢絲禪榻畔
又從前夢得風流

懷西湖次東坡原韻

西湖東南美遊眺多高賢白蘇兩寓公領略得其全
余愛山水出郭疾病捐譬彼蜂就蜜所性良由天盤山

與廬阜入手自往年西湖咫尺耳徒聞好事傳今夏六
月中緬想荷花鮮秋憐湖上峰娟秀縈雲煙何待段橋
畔桃柳爭芳妍晴空每矯首清夜或廢眠幾日冷泉亭
佳茗手自煎一枝老藤杖須趁腰腳便勝地如勝友堪
結歲暮緣鴨觜船易買已辦囊中錢

重陽日天岳禪師以詩集見寄聞師已來吳門即

用集中贈孟舉原韻奉荅二首

當官自許世情疎霽景高軒落木初上客前宵纔賦別

謂孟舉道人九日有來書叅從名嶽機鋒迴句並寒花氣格

殊聞道半塘畱拄杖隔城隱隱聽鐘魚

園官節物薦香橙發興翛然已洞庭幾日快乘黃篋舫
與公遙入白雲層因緣晚歲知非偶瓶拂空山愧未能
待得新詩同賦後寄聲廬阜打包僧

時高足心壁
方住開先

九日池上示子湘

秋色連朝攬最多霜威欲倒半池荷乍憐黃菊窺人在
未返青山奈老何舊雨每來方外札新詩偶向水邊哦
相看一笑清如鵠惟有韋菴與亦窩

子湘
別號

秋日泛舟橫塘遇晝公藻上人同過雙橋菴卽事

有作

臥聞孔雀叫喜茲秋日晴凌晨喚牒子隨意橫塘行雙

橋背城郭山水相映清刈稻時未了極目黃雲平穩重
風乍拂入耳瑟瑟聲道遇兩禪客高話懷抱傾矮屋就
破寺野飯惟蔓菁晝公天童裔法海吐長鯨餘事作詩
老座與石門爭謂孟舉藻師後來秀頗號琴理精爲我鼓一
曲幽韻流茅楹落日催返櫂霜月當頭明緩緩歌水調
無使宿鷺驚

寄查梅壑

誰擅書畫場元明兩文敏華亭得天授筆墨絕畦畛梅
壑黃山翁老向竹西隱崛起藝苑中華亭許接軫昨摹
平原帖丰骨何迺緊更圖獅子林嬾瓚韻未泯祇今年

八十抵掌談元牝興發自清夜深杯每獨引當其揮灑
餘卷軸如束筍破紙及斷縑求乞無遠近聞君初生歲
上與華亭準印鐫後乙卯好事供一听梅壑與華亭同于支常鐫一章曰後乙卯生
維余托同調思君憂心慙一官坐束縛欲往愁鞞鞞因
風寄此篇望氣等關尹

示族子舉

莊敏山頽後於今已百年何人復其始維爾得諸天守
口三緘在窮經一榻穿白頭竹林叟歲晚藉周旋

高江村詹事舟過吳閭得縱觀所藏書畫臨別以
董文敏江山秋霽卷見贈作歌紀事錄卷尾

昭代鑒賞誰第一棠村已歿推江村五年當湖暫休沐
摩抄卷軸窮朝昏昨歲寄我銷夏錄雲煙過眼實第曩
今年奉 召北赴 闕書畫船泊胥江濱相見不暇作
絮語珊瑚之網出異珍金題玉躐得未有傾囊倒篋縱
橫陳卷舒寧辭胝我手聳肩靜對不欠伸三日眠食爲
之廢有時大叫忘主賓富春山圖袁生帖無上妙迹欣
相親楓橋祖席興不極華亭畫卷許更捫煙江煙江疊嶂圖秋
霽兩奇絕氣韻生動真天人秋霽長不滿三尺高麗表
紙光如銀一重一掩師造化一樹一石絕點塵從來詩
理卽畫理芙蓉朝日相鮮新跋云古人不我見大癡心

折定九原朱印燦燦色奪目朝鮮國王印點綴更足重璵璠先

生好我舉相贈題識數語情彌敦欲辭不得拜命辱包

裏脫我衣與巾要我長歌記勝事報辭良愧薄且貧歸

來重展燭屢跋缺月光射莓牆根苦吟攢眉作山字句

雖不警事則真錄入卷尾更寄似此詩此畫爭千春

歲暮池上用韓子蒼次胡元茂館中直宿韻

文書撥不開幾廢食與眠鎖印指老眼擬向山水看東

軒坐朝霽小池風生瀾偶折鄧尉花載泛堯峰泉吟懷

忽跌蕩咫尺煙波寬惟有池上鶴刷羽同清寒

論畫絕句二十六首

真贗何須苦辨之邢夫人至尹能知夜無燈火分明在

此語雖誇理未奇余嘗云黑夜以書畫至摩抄而嗅之可別真贗

退谷先生孫侍郎承澤許數過高齋三雅共摩挲偶披五石瓠

中目始恨當年未見多侍郎以楊補之竹趙子固水仙王元章梅為三雅因以名齋五石瓠為劉繼著

崇村真定梁相國座上見聞新好古應知自有真一語殷勤忘

不得別來常歎巷無人真定札中語

坡於摩詰無閒言山村小幅曾拜觀天水徽宗對題有斷

句憶之日午忘朝餐

宣和供奉王希孟天子親傳筆法精進得一圖身便死

空教腸斷太師京希孟天姿高妙得徽宗祕傳經年作設色山水一卷進御未幾死年二十餘其遺跡祇此耳徽宗以賜蔡京京

跋云希孟親得上筆法故其畫之佳如此天下事豈不在乎上之作之哉今希孟已死上以茲卷賜大師臣京展閱深為悼惜云

夏山待渡客爭談未覩令余抱此慙龍宿郊民典型在

長虹貫月自江南皆北苑各迹

李成關仝兩巨手少年曾見長安中名家掩映數十輩

彷彿大海當迴風

蟹爪樹枝鬼面石河陽大幅太行圖挂起淋漓元氣濕

真成驚倒倩人扶小米自題瀟湘圖云壁張此畫定驚倒先請倩人扶著君

密雪煙嵐畱寶軸盧汀密雪煙嵐欲雨二圖惠崇僧及巨然僧漫言筆墨

尋常事此際同叅最上乘

鐵網珊瑚鑒賞真清河氏亦有心人鈔來祕冊珊瑚網

耳目連朝總一新朱存理著鐵網珊瑚張丑著清河書畫舫汪珂玉著珊瑚網

徽鷹韓馬戴嵩牛學語小兒也妄收誰知別有句龍爽

已向公麟踞上頭

平生不識洪谷子餘子丹青各有長卻訝華亭真放膽

竟從酒肆貶長康董文敏云余從攜李項氏見顧長康畫直酒肆中物耳

坡仙十指縣槌後怪石枯槎爾許奇涪翁句子君知不

海內文章非畫師

二米落筆天機到元暉得意圖雲山元暉有雲山得意卷畫本何處

任撫取金焦煙雨空濛閒

中丞撰述寄吳門下中丞永譽著書畫考書畫源流費討論今日快披

消夏錄一時雅尚又江村高詹事士奇

南宗老筆一峰孤貌得虞山氣韻殊屏幃邇來撫倣徧

何曾夢見富春圖子久有富春山圖

梅沙彌得巨公傳竹石蕭疎也可憐偶吟一片江南雨

清絕襄陽孟浩然梅道人自題畫竹云涼風起研池葉葉秋可數京華客夢醒一片江南雨

黃鶴山樵吾最許風流不愧鷗波甥青弁一圖文敏拜

黃華亭誰其繼者虞山生王翬

倪畫有無分雅俗江南好事重雲林獅子林圖最烜赫

撫本猶抵雙南金查士標臨本最佳

國初以來推具眼櫟下周公亮工禾中曹公兩侍郎鵲華秋色

看題識更為禾中一瓣香曹跋松雪卷云畫似輞川圖書似黃庭經此卷實傳書畫衣鉢

華原雪景特雄奇筆底全將造化窺韓碑杜句取相況

解道文人即畫師青門邵長蘅曰余曾見范寬雪圖博大雄奇譬之詩文則杜之北征韓之淮西碑也宋鄧公壽畫繼云畫者文

之極也其為人也多文雖有不曉畫者寡矣其為人也無文雖有曉畫者寡矣

畫手吳中舊擅場衡山大雅石田蒼解元真跡今寥落

片紙猶生琬琰光

辛苦仇生學大李畫時鼓吹不聞喧見董文敏畫旨怪他小冊臨

摹好風致超超又宋元

一對珍圖一洗心箇中大是少知音偶拈舊話成新句

風雨空牕細細吟一貴官語余曰骨董中鏡與劍差足取以有用也最無用者惟畫乎余笑曰公好官請以官喻凡抱關擊柝各

有所司所謂有用也若宰相無專職而百官之職皆其職如公言則宰相最無用矣
世間衣服飲食宮室皆用之適吾身獨畫用之適吾心當塵埃勞勞中忽展名畫便
如置身長林巨壑心爲一洗或對古名賢高士則
肅然起敬畫雖一藝其用最大願公勿輕議也

華亭天授非人力六法何妨有未工多少畫家三昧語
畱題斷紙故麻中

不薄今人愛古人眼前誰識宋元津畫中九友王翬在

吳祭酒偉業有
畫中九友歌

白首多年奉紫宸

乙亥元日雪同子湘山書試手爲長句

去歲春雨兆有年長句曾寫述鹿軒今年元日更快意
開門大雪來漫天五更的皜晃冠佩向曉飄瞥迷市廛
朝正已罷掩戟戶平鋪曲逕添靜便登樓一望飛鳥絕

穹窿峩岸何處邊方塘波溢石欲沒小梅濕重香微傳
打麥穫稻事可必田租之半況已蠲青門客園兩詩老
競呵凍筆吟聳肩吾山香海待臨眺歐公白戰聊周旋
詩成呼酒澆利市我醉欲枕印麓眠黃昏簷溜滴不止
風吹街鼓聲闐闐

黃山松石歌寄金仁叔將軍兼索子湘和

黃山松石天下無好事往往繪作圖千巖萬樹不到眼
刻意摹寫徒區區茸城將軍胸次別遠道移取來崎嶇
石一拳耳儼千仞松不滿尺盤兩株盛以巨盎置鈴閣
珍比七尺紅珊瑚今年移鎮向閩海臨行輟贈及老夫

鴨觜船載入廨舍賓客咋舌兒童呼吟窩得此良不俗
大笑今我官豈麤南榮相對坐竟日看山讀書同歡娛
石也以松爲毛髮松亦以石爲肌膚芙蓉一片忽墮地
陵巒宛轉秀色殊擾龍雙幹雙塵尾干霄之勢當前俱
晉卿倘見定豪奪柴桑或撫還驚吁叢桂疎梅助清致
何煩命駕窮天都將軍雅意應有報幾迴欲賦還踟躕
今晨鼓興了此債屬和火急催髯蘇

和子湘春雪後夜坐效韋左司

梅花半將開媚此雪後月空亭耐春寒坐到昏鐘歇池
光明檐楹鶴唳激林樾幽人默相對詩思清到骨

正月十四日雪中登瑞光寺浮圖

青帝作意驅滕六大雪江南壓倒屋自從元日到今日
不見昏星與朝旭人言南雪不到地異事爭詫今年獨
閉門兀坐殊無憀如鶴剪翎驥維足茲晨冒雪鄰寺遊
不怕泥深沒雙轂到門鴨腳帶鴉楓輪困離奇結寒玉
厭聞殿閣鬧鐘魚直上浮圖散心曲欄敲磴滑幾登頓
扶持左右資童僕侍行諸幼氣食牛

謂兒筠孫
韋金華金

笑我老翁

何跼促當檐四顧雲盪胸七堰八門辨隈隩亂山晶瑩
朔氣凝萬井蕭摵炊煙矗胥江瀾瀾吹東風鱗次征颿
靜相逐懷古擬葺滄浪亭開宴未踵香山躅下從別院

訪梅花真訝佳人在空谷黃昏雪急耐荒寒還走後園
看凍竹狂夫自笑老更狂有胸不貯塵十斛言歸路出
吳趨坊萬點華燈燦奪目

廬州張見陽太守以倪高士秋亭嘉樹圖見貽卽
用畫上韻走筆荅之

秋亭嘉樹氣蒼涼小幅摩抄向霽牕新寄雲煙勞太守
舊分雅俗說吳邦

江南以有無
倪畫分雅俗

哦詩讀畫堪終日望遠臨風

悵隔江珍重篋中撫本在蕭疎丰韻也無雙

見陽曾以
撫本贈余

題袁中江小照兼送入長安

袁生江湖客氣吞江與湖好詩更好劍七尺昂藏軀誰

將片跡蹠貌出鬖鬖鬢長嘯竹林下捧劍隨童奴似此
熊豹姿寧終老菰蘆春風吹遊屐又欲入 帝都故人
有延譽馬周當齊驅莫漫斫地歌但醉妖姬盧

春日同葉公霖遊支硎華山五首

溪漲橋難越輕舸野岸停晴光迎瘦策曲徑入支硎馬
蹟侵苔碧

支公
遺跡

僧廬蔭竹青一翁年八十長嘯振巖扃

謂公
霖

無復寒山主荒涼小宛居畱雲空閣在臥磧老梅疎古
墓人誰到飛泉雪自如清詩傳祭酒吟罷一欬歔

吳梅村
先生有

題趙凡夫
丙舍詩

春半法螺菴梅花蕊尚含幹盤驚戶牖香冷雜煙嵐看

竹憐幽夢

一僧題壁有竹深僧夢綠之句

登樓作小叅幾多飛動意還向翠

微探

石隙泉流迸松陰磬響傳峰圍深殿肅花覆斷牆妍初

地雷

天藻寺有御製詩

空山閔沼蓮所嗟三十載法席幾回

遷

余初遊華山時蘂菴主席繼之者為僧鑑今亦化去

石佛巖邊坐千峰落照閒未能邀月上聊此放歌還羈旅又新歲煙波空舊灣一燈官閣下覓句似僧閒

婦翁葉司馬公

廷桂

為文文肅榜進士公從子公霖

偶來吳門於華山精舍遇輪菴上人文肅從子也公霖坐閒談文肅經筵進講春秋及爰立時

奏罷鎮守中官二事余慨然為賦二首

一老閒身一老僧空山解后揖紅藤通門子弟前朝話共對梅花涕滿膺

文肅登朝有古風春秋大義講筵中觀軍容罷公閒住信史還徵八十翁

虎丘看玉蘭二首

名花傳虎阜輪囷不知年爛熳春風裏憑凌玉樹前香能尋小閣雪欲障遙天共道今番盛浴溪簇畫船

花光滿幽谷苔色映高牆細雨一來灑空山不斷香佳人曾對舞用楊太真事初地任持觴七字天隨句風流獨擅場

久雨忽晴喜子湘心壁道人同日至援筆賦此
一春積雨徑生苔池館今晨霽色開高士青門行藥至
道人廬阜打包來禪牀吟筆須料理蟹舍漁莊好湖洄
莫問政成鐙脚否唐河北三郡相鄰皆有善政號鐙脚刺史山桃花下且銜杯
自題八年前小照送開先寺方丈二首

看雲坐石西陂叟雙鬢依然歲月更今日披圖堪一笑
圖中為弟我為兄
鶴鳴峰下摩苔碣漱玉亭中聽瀑泉世出世閒緣有在
且將小照寄開先

題九悔菴萬峰探梅圖二首

昂藏海鶴鬪精神長嘯空山作好春真才子與老名士
又署新銜梅道人真才子老名士乃世祖及今上玉音也
八十老翁一壺酒梅花萬樹興飛揚香山句子取相贈
從此無多二十場

聯句

初冬夜集聯句同高念東先生曹實菴王阮亭謝方山

羈棲欲何為不如行荷鍤念翁筇倦招提遊先是有勝果寺之約飲愛

文字洽牧仲晚照橫蒼山涼風吹白帽寶菴稻芒蟹初擘松

牀酒新壓阮亭殘菊映深杯狂言遞相狎方山人皆白社侶

詩競黃池畝阮亭妙畫鑿東丹是日觀東丹王射鹿圖歸人憶巫峽阮亭坐中吟不

得荔裳妻琴下峽
消息詩 牧仲
西曹最喜齋北陸巧當裕念翁霜威逼簷牙星

芒動簾押牧仲不妨乘興哦未中考功法念翁暖思漢廟耐

冷畏堯廚萋阮亭卮漏川灌河氣壯兕出押牧仲暫爾賢聖

中詎必金貂插實菴采隱夢廬霍泛宅羨苔雪阮亭斗室卽

江湖拍浮類鳧鴨牧仲旅懷歡已忘險韻句偏恰念翁天馬

行馭娑海鯨動呀呷聲殷雷破壁勢急帆出夾阮亭縱橫

字屢乙跌蕩顏能甲實菴銘鑿聲叟樽書畱老嫗筵牧仲久

企松子游無事宣公劄方山稍聞動鼉鼓曾否熱羊胛實菴

勿憚金吾訶重沽錢未乏念翁

聖安寺聯句
同高念東先生施愚山王阮亭謝方山錢介維袁士旦

暮雲如斷山返照林下寺阮亭蕭散乃良覲斷續幽人至

入門盼寒柯揖讓爭行次念翁牆剝古時紅柏剩經冬翠

士百肅肅僧寮清穆穆禪宮闕方山草創緬金元烝嘗借初

地寺內舊有金世宗章宗像元初奉太祖以下神主于寺之瑞像殿金貂會三族絳節來羣帝爰

溯大定年下泊至元世刹那人代變彈指河山異阮亭茅

社閉天陽仍歸瞿曇氏念翁法象窮雕鏤鄭重 先皇昇

寺有佛像出大內鷲嶺舊飛錫龍馭屢迴轡梅檀佛嘗飛至寺中元學士程鉅夫有記百靈走

蒼茫三車赫鼓吹愚山妙相初無言宛若拈花示維摩不

二門灼然第一義念翁畫壁商喜畱吳瑋何詭麗牧仲絕筆

追顧陸纓絡雜珮璫方山天女靜窈窕雲旗儼容裔牧仲勢

伏龍虎馴氣攝魑魅悸方山 梅檀邈古跡金粟爛名繪介維

竹房穿碧煙苔碣捫綠字昨聞捷奏宣黔陽走吳淠從

此罷鼓鼙花龕得高會牧仲 殿閣明佛鐙齋廚出香豉方山

生菜薦春盤巨匕削羊截介維 難窮祖帳情時念翁 略遣文

字戲愚山 擁鼻發長吟談天奮高視酒氣徹鬢眉墨痕澹

指臂士旦 雅調紛鳳鸞險語掣鷹鷲笑驅山可移怒號星

欲墜韓杜競倔強皮陸閒流易錯雜成宮商一滴大海

味愚山 既足張楚軍亦已拔趙幟念翁 舒嘯和哀猿振藻慚

上駟牧仲 共擬寒山詩聊述淨名意阮亭 鼠鬣爭歲蕤鴝眼

交睥睨揮毫詫脫兔敵人不及避介維 河嶽曠遙情海岱

羅奇思欣感共顛倒主客謝拘忌愚山 綦烏錯羣賢旗鼓

當大帥士旦 鬪場號禪窟東安妙談議未能離塵垢稍欲

藉鉗錘阮亭 精藍梅吐苞老樹烏垂翅蒲牢時一鳴牟尼

靜如睡士旦 飛蕩落罌罍空垣凋薜荔牧仲 篆煙縈後貌香

臺蹲鼻鼻方山 野馬靜諸天蒼隼側雙背士旦 醉鄉戰已疲

重圍或可潰天寒僕御愁促別喧車騎念翁 迴聽金琅璫

星河宿檐際阮亭

筵上咏鐵腳聯句同王阮亭周紫海謝方山

經年疲塵鞅埋首困束縛沐浴乘春閒客過欣同酌方山

春盤風味佳薦此野田雀牧仲 羽族誠瑣細高舉慚肉攫

阮亭 逐隊從鳩燕潛身避雕鶚方山 曾向大官厥鼓翅恣饒

啄紫海 有聲但勞利無心慕寥廓阮亭 稻梁性能諳林園意

彌樂士百 穿屋軀體微啁簷毛羽惡牧仲 祥知近集庭孝感

遙投幕引羣賀厦來應瑞銜珠躩六翮奮何時一枝且

深託胡為鍛羽翰橫取媚脾臄山尊 啁啾鴛瓦翻歷亂雲

羅著介維 彈射空城尋縷切初筵數牧仲 量同十步飲智愧

三嗅作長竿類黏蟬明珠異彈鵲阮亭 率場田父愁繞砌

兒童捉介維 佛首野夫獻斲脛庖丁斫阮亭 稍聞鼎俎香太

息虞羅虐士百 品雖遜熊魚味終壓藜藿方山 七箸任縱橫

口吻鑿精鑿充腸失肥甘膩手信披剝微如出醯鷄飛

似捨榆鶯士百 鮮肥有本來香脆妙煎燂腸胃少腥羶骨

骼耐咀嚼夥聚無一鬻連啗豈滿壑介維 瞪目冀豐餘朶

頤恣酬酢山尊 染指類龜羹鬪箸並鷄臠牧仲 狂寧乞鵝炙

渴欲思羊酪妙手菹薑橙真意謝糟粕噬聞宮徵調老

畏牙齒落阮亭 髯掀競橫肱纓絕肆浪謔紫海 披綿映短燭

截肪侑康爵報恩懷玉環錫名徵鐵脚牧仲 詎能咸其腓

誰解鑄此錯阮亭 人生耽口腹是物勞熏灼牧仲 適口念生

成感心增索莫山尊 小鳥生有營老饕意無怍士百 羣飛失

翱翔鬻取爭霍霍牧仲 殺機滿天地繒繳到山澤阮亭 慨彼

弱羽加何異遊魚涸山尊 靜觀大化理坐歎生機薄士百 侶

燕危處堂伴鼠憎無角介維探穀餓憫趙銜穀貴占郭牧仲
蚌蛤化已遲螳螂伺猶昨勿笑掩目捕寧思撫髀躍阮亭
我欲返其淳解網出湯鑊塵清威鳳游政憚仁麟格皇
然象帝先鳥獸稱咸若紫海

木瓜聯句同錢介維兒至

嘉果美中州碩大懸林木熟檀香勝棠烝栗色媿玉種
處異東門摘日當西陸牧仲 李生怪心空柰似喜瓣簇數
枚燕公袖五株華林曲介維 實成壓哀梨花發值杏粥剛
葉煩村翁綴枝駭園鹿至 斗漫誇赤萍卵或遺黃鵠蠻
榼顛遜芳諫果品同肅牧仲 鹽山恨未登何賦快曾讀光

怪金纍柯聲價珠傾斛至 曰瓜省鋤勞非棗惱鄰扑韻
繼萬卉凋收比五穀熟啄防大觜烏蠹剔在桑蠋牧仲 攀
取得團鬪拂拭藉巾服至 素商吹自幽青女飽更馥藥
物宣城良土賦杭湖足介維 裴疑海國珍權慮關門酷牧仲
郵遞競兼程稗載妙盈麓介維 聽鸝鄙一雙耀車當二六
懷橘自徒爾過江能化不牧仲 濡澤佛手慙氤氲仙掌嶺南
恧至 持贈燦筐筐護惜視寒燠牧仲 磊砢幽人喜饕餮雅
子欲至 盤盍位置高橙柑姊姒屬雖謝霜柚圓頗笑凍
芋縮牧仲 種憶黃臺分蔓匪朱陵續蜜脾潤詎乾砂斑點
未浴供訝緱氏埋削宜公輸督介維 當俎菌蠹敲縈座霏

微獨牧仲冰骨傲雪霜膩色逞膏沐侑酌薰夕牕伴書媚

朝旭至鼻觀趁靜便手弄戒迫促牧仲釀酒和秫稌瘳痾

薄參茯至豈惟呈陸離兼能已拳蹙介維夥薦傍畫屏醉

攫翻棋局釋名酢可餐御冬旨偕蓄牧仲酸苦愁客心苞

苴感末俗宛將梔蠟搏那異鬱金築介維三復報琚篇相

投莫碌碌牧仲

宋刻絲蟠桃圖聯句同兒

短縑結奇繪有蕢羨嘉果牧仲纂組渾端倪點染謝婀娜

至藉機杼寫生堪禋祀伴菰青絲用引枝縹色妙烘穎

牧仲獨樹迴扶疎連蒂恐傾墮至幹橫待胎禽葉蝕疑螺

羸牧仲頰榴或等觀玉李未足夥至海嶠貌來遙斗室懸

處頗牧仲魄礪實一雙掩映雲五朶至鳳梭意良工鮫織

筆非左牧仲在藝得神明涉想極么麼至肖形儼吮粉申

咏窮炙輶牧仲細玩倍咄咄驀見信可至憎俗錦段拋

畏偷房櫳鎖牧仲鵝溪遜爛熳顧繡笑纖瑣經營實云勞

位置亦殊妥至王母授恆珍徐熙技難播涎從摩抄流

摘欲襟袖裏牧仲宋代製何人潞沙寶維我至精光騰卷

軸壓倒米家舸牧仲

雨中漫堂聯句同何次德
陳次山

薄宦念索居苦旱憂正切客驚二妙來霖降三伏節雷

殷驅鬱烝颺散動騷屑

牧仲

商舞日色沉礎潤土脈泄

次山

黑入太陰垂光閃銀海澈衛公一何莽錢唐信作孽澎

湃河勢傾照耀電影掣

次德

賦草愁漫摘亭名喜任竊別

院飛潺湲急響傳駟鐵

牧仲

閣鈴亂旬旬庭麥漂漵冽燕

翻失呢喃鶴聳羨孤潔

次山

誰移匡山瀑懸向官舍稅生

憎盜階除將毋煩榜柂

次德

石洗苔露錢漲發洲隱玦灤

鯽竚大上潞沙畏突決牀遷豐溜隨步舉洪濤截

牧仲

披

襟彌清涼卷幔謝炎熱

次山

幸停吳牛喘宜取漢書閱

牧仲

蝸廬紛縱橫蠅鼓獨怡悅

次德

荷葉倒半池榴英墜干結

牧仲

檐柯俯而恭檻草偃莫茁

次德

俗韻清淙淙幽興爭滴

滴氣侵香篆搖波晃觥心凸

牧仲

娟淨明葛衣蕭爽透簟

次山

篔坐起嗟滂沱轉盼屆寥泚豐凶變俄頃天地用奇

譎

牧仲

汎濫成巨浸畚鍤開水埒只合把釣緡還須躡輕

橈垣頽戶難扃薪濕煙不熱

次德

泥融拔蜀黍風微鳴蜻

蛸

次山

蜨綵黏簾旌蟻陣遁槐穴酒瓢憶空山破牕記老

鐵

楊鐵崖有破牕風雨記

感宋玉秋懷奪阮瑀吟訣

牧仲

茫茫隔林巒活

活泥車轍

次德

咫尺同濠梁曠望渺勃碣陂塘下閒鷗睥

睨挂殘蜺

次山

雲威互凌競星芒乍明滅

次德

戍漏聽已罷

筵燭跋亦迭旣醉霽景臨申旦高唱闕城南追勝遊絕

塵共奔軼

牧仲

孔雀聯句

同兒

珍禽產炎方嘉名錫南客品流亞鳳鸞羽毛豔圖冊

牧仲

紀官今大夫獻瑞昔重譯至卯伏或在埒籠致恆從舶

小兒對本佳九嬪賦稱藉翠旂今楚吟飛蓋焉漢借

牧仲

樹尾聲肅肅蹠足晴覘覘矜麗逐冶容導舞應手拍

至

思鬪儼鷄雄獨立分鶴格牧仲金錢列繡屏綠蕤聳彩額

至行憐襦褌披叫任郁伊嚇似竊龜背穹應受鶯歌責

牧仲飲泉牴防牛啄地毒尋螫至薄怒首漫翹偶驚角忽

坵牧仲入春倍絢奇落花齊凋翮碧鷄謝森纒綠鳩畏逼

迫絲竹愛啁啾鷓鴣等格磔團扇製遜工車輪樣爭赫

棲宜珊瑚枝步當瓊瑤席織裘藻火鮮珥戶錦雲奕萬

里來三梁兩年伴雙戟鈴閣引頸閒嶺徼歸路隔至影

弄晴景初夢繞瘴海夕牧仲每歎造物靈允屬文鳥伯至

命儔整以暇比翼光而澤朝飢生菜耽暮宿高架擇沙

虛臥喜便徑曲飛嫌窄牧仲頰渾染淺黃衣不著點赤至

傍籬菊愧金照水池全碧看雲頻孤騫下階時一擲懿

哉西施稱困矣太尉宅枇杷取共寫黃荃有枇杷孔雀圖鸚鵡許同

適丹梯舊訝登桂蠹疇醫瘡病亦來清詩貴維因創獲

蹉跎感待士悵望傷寄迹牧仲久結青霄懷會充元圃役

至西崑刻畫餘漫堂更攬撫牧仲

鮒魚聯句 同周岷公朱悔人吳志上兒至

時鮮誇南州首夏三鰲薦嘉味配朱櫻芳辰趁紫棟 牧仲

白浪狎噏喙碧藻恣遊行 至 昔名江東產近憶富春岸

叶公 巨口不足稱縮項那堪羨 至 响沫信知樂小觸輒生

娟色潔鏤晶寒腹膳堅甲繕 悔人 鼓髻奪爛銀脫網閃淨

練形秀躍匣刀刺彘拆襪綫 牧仲 後鱗諒匪誣去養當屬

諺 至 出水尾未頰入筍目猶眴 岷公 來應月令候行不江

湖徧 至 恪貢馳驛騎特獻開寢殿稍踰往歲期恰佐端

午醺 牧仲 飫嘗歡野客中廚先使院 悔人 既陋白小微亦晒

松鱸短 叶 如茶列犀鎧滋灰結寶鈿細瑣骨支撐叢苞

子連貫 叶 飪合澗芹兼雋竝盧橘見 岷公 滌腴挹泉乳助

韻芼薑片 志上 釋名爾雅闕方法本草撰登俎防損鱗貯

肪偏宜甌 悔人 較河豚謝毒與熊白等觀 叶 香疑蹇鼎熟

飽覺颺飲濫 叶 脂滑乍霑脣羹美畱漬麪 志上 生致體殊

瑩緩烝勢若顛畏啖何其愚 蜀人呼為瘟魚不敢食 得珍未妨擅 悔人 買

時綠荷包膾處霜刃剗玉屑簇簇攢冰花差差纏 至 風

透座送馨日晡色不變骨鯁雖摧殘煙波仍眷戀 志上 老

饕偕五君朶頤或三嚙盤罄風雨疾箸鬪楚漢戰 牧仲 蠻

語詠叅軍齋心戒許掾 子是日蔬食志上 雅章緬信陽託諷意何

限 叶 牧仲

紅豆聯句

同錢介維吳志上兒至

亭亭海南木結子麗不億

牧仲

託根自蠻方秉性具炎德

介維

種植徐表傳土物宋祁識

至

樹爭號杪擢花迴類簷

葡萄脫莢狀仍菽卻瘴功等蕙

牧仲

擊珊瑚紛如染靺鞨一

色

介維

臍裂儼掐痕膚茜足首飾

志上

啄許綠衣背棲合丹

山翼

至

妃淚凝冰丸鵲血漬粒食

介維

含桃脣乍翻澡豆

面同拭

志上

飮果陋巴蜀夥銀尚京國

俗多干銀袂中貯之

至豔將火棗

齊圓未驪珠逼

志上

映燭暈彌增記曲名舊得

介維

貽喜傾

筐傾貢缺職方職愛之則龍睛棄之則鷄肋

至

嵌毆播

樂府賭酒效鉤弋

牧仲

打鴛鴦以雙寄綢繆怨特

志上

比難

窮羅蚪藝匪待后稷

介維

好製絳囊盛恐被黠鼠賊

志上

蒙

叟名山莊風流信無極

牧仲

秦吉了聯句

同朱竹垞邵子湘

珍禽產邕管自呼秦吉了

子湘

脩脩羽儀澤炯炯眸子瞭

竹垞

紺衿映日明花翅點雪白

子湘

尾輸山鷓長形陋么鳳

小丹味漫多知黃距亦何躄

牧仲

批肉冠樣奇垂耳蠟光

皎

竹垞

跣跣儼鵠嗅嗅鄙伯趙好語鎮閒關餘音或繚

繞

牧仲

雖殊鳩舌蠻偶類雉鳴鷺

竹垞

宣和譜乃遺爾雅釋

未表屢奮躍不停獨立聲忽悄唳受野鶴欺飲慮狡童

鵬

牧仲

甘與炎陬辭怕趁海舶香羈棲恣飲啄簾幙信昏

